

Yankuik kuali tlajtoli tlen okijkuilo San Juan

In Tlajtoli omokuapki tlakatl

¹ Antes de oyeskia in tlaltikpaktli, yokatka in Tlajtoli, iva yejón Tlajtoli okatka ivan Dios, iva yen Dios.

² In Tlajtoli okatka ivan Dios desde ijkuak ope in tlaltikpaktli.

³ Iva ika yejón Tlajtoli, Dios okichi nochi tlen onka. Iva tlamo por yejón Tlajtoli, nochi tlen onka amo oyeskia.

⁴ Itech yejón Tlajtoli kajki in nemilistli, iva in nemilistli yen tlavili para kintlavilis in tlaltikpaktlakah.

⁵ Nin tlavili tlavia kan tlayova, iva in tlayovalotl amo veli kisevia.

⁶ Okatka se tlakatl itoka Juan, tlen Dios okivaltitlanki,

⁷ para ma yeto kemi testigo iva ma tetlapovi de yejón tlavili, para ijkó nochtin ma kineltokakah.

⁸ Juan amo yen tlavili, sino Dios okititlanki para ma tetlapovi de yejón tlavili.

⁹ Neká tlen yi neli tlavili yoajsitivalaya itech nin tlaltikpaktli para kintlavilis nochtin tlaltikpaktlakah.

¹⁰ Neká Tlajtoli yokatka itech nin tlaltikpaktli. Iva por yen Tlajtoli Dios okichi in tlaltikpaktli, pero in tlaltikpaktlakah amo okixmatkeh akin Ye.

¹¹ Ovala itech nin tlaltikpaktli tlen Ye okichi, pero tlen iaxkavah amo okiselijkeh.

¹² Pero nochtin tlen okiselijkeh iva okinel-tokakeh, okinkavili ma mochivakah Dios ipilvah.

¹³ Oneskeh kemi Dios ipilvah, pero amo oneskeh kemi ijkuak se tlakatl ivan se sivatl mosetiliah para kipiah inkone, sino oneskeh kemi Dios ipilvah porke otlaneltokakeh inavak.

¹⁴ Iva neká Tlajtoli omokuapki tlakatl iva tovah okatka itech nin tlaltikpaktli. Iva otikittakeh imavistilis, iva yejón mavistilistli kipia san yen iKone toTajtzin Dios, porke otechititi nochi itlasojtlalis iva nochi tlen yi neli melajka.

¹⁵ Juan otetlapovi aserka de neká Tlajtoli. Iva chikavak okijtovaya:

—Ye nin tlakatl tlen ne onimechilviaya: “In tlakatl tlen vitz satepa de ne, Ye okachi weititok iva amo kemin ne, porke Ye yokatka desde antes de ne ninesis.”

¹⁶ De nochi tlen kipia, tinochtin tikselijvitzezh okachi iva okachi de itlatiochivalis.

¹⁷ Dios otechmakak itlanavatil por medio de Moisés. Pero itlasojtlalis iva tlen melajkayotl, ovala por medio de Jesucristo.

¹⁸ Amo keman íkka kitta Dios, pero iKone tlen san Ye se, tlen noijki Dios iva kajki seppa inavak iTajtzi, Ye otechixmatiltiko in Dios.

*Juan tlen tlabautisaro okijto mach yen Cristo
(Mt. 3:11-12; Mr. 1:7-8; Lc. 3:15-17)*

¹⁹⁻²⁰ In tlayakankeh judiojtih de Jerusalén okintitlankeh sekimeh tiopixkeh iva sekimeh levitas

para ma kitlajtlaniitih in Juan akin ye. Iva Juan okinmilvi tlen yi neli:

—Mach ne niCristo.

²¹ Ijkuakó yejvah oksemi okitlajtlaniykeh:

—Toneses, ¿akin te? ¿Te tiElías?

Juan okinnankili:

—Amo, mach ne.

Oksé welta okitlajtlaniykeh:

—¿Te tiprofeta tlen tikchixtokeh ma viki?

Ye okinnankili:

—Amo.

²² Ijkuakó okilvijkeh:

—Toneses, ¿akin te? Moneki techilvi para ijkó velis itla tikinmilviskeh tlen otechvaltitankeh. ¿Tlán velis techilvis de te?

²³ Juan okinnankili:

—Yen ne tlen nitetzajtzilia chikavak kan tlavaki: “Xikmelavakah iojviv in toTeko” —ijkó kemi okijto in tiotenejmachtí Isaías.

²⁴ Yejonmeh tlen oviah okittatoh in Juan, yejvah in fariseos okintitlankeh,

²⁵ iva okitlajtlaniykeh:

—Tla amo te tiCristo, nion amo te tiElías, nion amo te tiprofeta, toneses, ¿akin omitznavati xitlabautisaro?

²⁶ Juan okinnankili:

—Ne nitlabautisarova ika atl, pero imovah kajki se tlen imejvah amo inkixmatih,

²⁷ iva yen tlen vitz satapa de ne. Iva ne nion amo notech povi para nikintojtomilis ikakvah.

²⁸ Nochi nin tlamantli otlamochi itech altepetl Betábara, ik nepa lado de kan weyatl Jordán, kan Juan otlabautisarojtoka.

Jesús yen iichkakone in Dios

²⁹ Omostlatik, Juan okittak in Jesús ompa vitz inavak, iva okijto:

—Xikittakah, yen nin iichkakone in Dios, tlen kinkixtilia intlajtlakol in tlaltikpaktlakah.

³⁰ Ne onimechtlapovi de Ye ijkuak onimechilvi: “Satepa de ne vitz se tlakatl tlen okachi weititok iva amo kemin ne, porke Ye yokatka desde antes de ne ninesis.”

³¹ Ne amo onikixmatia, pero Dios onechnavati ma nitlabautisaro ika atl para ke in gentejtih de Israel ma veli kimomakakah kuenta akin Ye.

³² Juan noijki okijto:

—Ne onikittak in Tioijyotzintli ovaltemok de ilvikak kemi se palomax, iva omotlaliko ipan Jesús.

³³ Ne ayamo onikixmatia. Pero tlen onech-valtitlanki ma nitlabautisaro ika atl, onechilvi: “Ijkuak tikittas in Tioijyotzintli valtemos iva motlaliki ipan se tlakatl, yen tlabautisaros ika Tioijyotzintli.”

³⁴ Ne yonikittak, iva por eso nimechilvia nik yen iKone in Dios.

Tlen primer momachtijkeh de Jesús

³⁵ Omostlatik, Juan tlen tlabautisaro oksemi ompa okatka invan ome tlen okinmachiaya.

³⁶ Iva ijkuak okittak ke Jesús ik ompa panova, Juan okijto:

—Xikittakah, yen nin iichkakone in Dios.

³⁷ Yejonmeh ome momachtijkeh de Juan, san nima ijkuak okikakkeh tlen okijto, oyajkeh ivan Jesús.

38 Jesús omokuapki iva okinmitak okivaltokayah, iva okintlajtlani:

—¿Tlán inkinekih?

Yejvah okinankilijkeh:

—Rabí —kijtosneki Tlamachti—, ¿kan tichanti?

39 Iva Jesús okinnankili:

—Xivikikah iva xikittakah.

Tos oyajkeh ivan Jesús iva okittakeh kan chanti, iva ompa omokajkeh ivan Jesús yejón tonali porke yokatka kemi las kuarto de tiotlaci.

40 Andrés, tlen ikni in Simón Pedro, okatka se de yejonmeh tlen okikakkeh tlen okijto in Juan iva satepa okiseguirojkeh in Jesús.

41 Andrés san nima oyá okitemoto ikni Simón, iva okilvi:

—Yotikajsikeh in Mesías —kijtosneki Cristo o noso tlen Dios okipejpenki.

42 Andrés okivikak ikni Simón inavak Jesús, iva ijkuak Jesús okittak okilvi:

—Te tiSimón tiipiltzi in Jonás, pero axka motoka yetos Cefas —kijtosneki Pedro o noso Tetl.

Jesús okinotzki in Felipe ivan Natanael

43 Omostlatik Jesús okijto yas ik tlali de Galilea. Ompa okittak in Felipe, iva okilvi:

—Xiviki nova.

44 Felipe okatka de Betsaida, ialtepe in Andrés ivan Pedro.

45 Felipe okitemoto in Natanael iva okilvi:

—Yotikajsikeh in tlakatl tlen Moisés okijkuilo itech itlanavatil, iva tlen okijkuilojkeh in tiotenejmachtijkeh. Yejón tlakatl yen Jesús ipiltzi in José de altepetl Nazaret.

46 Natanael okilvi:

—¿Velis kisas itla kuali de Nazaret?

Felipe okinankili:

—Xiviki, xikittaki.

⁴⁷ Ijkuak Jesús okittak in Natanael ompa vitz, okijto:

—Nika vitz se tlakatl tlen yi neli israelita, tlen amo kimati tlakajkayava.

⁴⁸ Natanael okitlajtlani:

—¿Kenik techixmati?

Jesús okinankili:

—Ijkuak otikatka itlampa igoskuavitzl, antes de mitznotzati in Felipe, Ne ipa yonimitzitat.

⁴⁹ Natanael okilvi:

—¡Tlamachti, tejwatzi tiiKone in Dios! ¡Tejwatzi tiwei tlanavati de Israel!

⁵⁰ Jesús okinankili:

—¿Techneltoka san por onimitzilvi onimitzitat itlampa igoskuavitzl? Velis tikinmitas okachi wejwei tlamantih ke ninmeh.

⁵¹ Jesús noijki okijto:

—Yi neli nimechilvia, imejvah inkittaskeh in ilvikak tlapotok, iva inkinmitaskeh in ilvikaktlatitlaniltih tlejkoskeh iva temoskeh ipan iKone in Tlakatl.

2

Se ilvitl kan monamiktiah itech altepetl de Caná de Galilea

¹ Oviptlatik okatka se ilvitl kan monamiktiah itech se altepetl itoka Caná tlen kajki itech tlali de Galilea. Imama in Jesús ompa okatka, ² iva Jesús ivan momachtijkeh noijki okinminvitarojkeh itech yejón ilvitl.

³ Ijkuak otlanki in vino, imama Jesús okilvi:

—Ayakmo kipiah vino.

⁴ Pero Jesús okinankili:

—Nana, ne mach nikpia tlen nikittas. Ayamo ajsi noora para nimoteititis akin ne.

⁵ Pero imama in Jesús okinmilvi tlen otlaservi-rojtokah:

—Xikchivakah nochi tlen Ye imechilvis.

⁶ Ompa okatkah chikuase xoktzimeh de tetl, ivan kada se xoktzi oakia kemi ochenta o noso sien litros de atl. In judiojtih okinnejnekih in xoktzimeh para omomajtekiayah ijko kemi kijtova intlanavatil.

⁷ Jesús okinmilvi tlen otlaservirojtokah:

—Xikintemitikah de atl in xoktzimeh.

Iva ijkuak yejvah kuali okintemitijkeh,

⁸ Jesús okinmilvi:

—Axka xixixtikah seki iva xikvikilikah in tetajchi de ilvitl.

Iva yejvah ijko okichijkeh.

⁹ In tetajchi okiyeko in atl tlen omokuapki vino, amo okimatia de kan ovala, okimatiah san yejvah tlen otlaservirojtokah porke yejvah okixtitoh yejon atl. Ijkuako in tetajchi de ilvitl okinotzki in novio.

¹⁰ Okilvi:

—Miekeh achto kitemakah tlen kuali vino, iva ijkuak yokonikeh miek, ijkuako kinmakah in vino tlen okachi korriente. Pero te otika tlen kuali vino para tiktemakas satepa.

¹¹ Ye nin yikinika tetzavkaneskayotl tlen Jesús okichi itech altepetl de Caná de Galilea. Ika yejon tetzavkaneskayotl okiteititi ivelitilis, iva in momachtijkeh okineltokakeh.

¹² Satepa, Jesús ivan imama, ivan iknivah ivan momachtijkeh oyajkeh kan altepetl de Capernaum iva ompa omokajkeh kana keski tonali.

Jesús okinkixti in tlanemakakeh de kan templo (Mt. 21:12-13; Mr. 11:15-18; Lc. 19:45-46)

¹³ Ijkuak yi mero ajsiki ilvitl de Pascua, inmilitiv in judiojtih, Jesús oyá para Jerusalén.

¹⁴ Iva kan ikiavak in templo okinmajsito in torojnemakakeh, in ichkanemakakeh ivan palomaxnemakakeh, iva tlen okipatlayah tomi oyetokah kan inmesa.

¹⁵ Jesús okichi se kuarta iva okinkixti de kan templo ika nochi intorjvah iva inmichkavah. Okintlamochili ipan tlali intomi tlen okipatlayah tomi iva okintlatlamochili inmesajvah.

¹⁶ Iva okinmilvi tlen okinnemakatokah palomaxtih:

—¡Xikinkixtikah de nika! ¡Amo xikuapakah kemi tiankistli ikalijtik in noTajtzi!

¹⁷ Ijkuakó, in momachtijkeh okilnamikeh ke itech Tiotlajkuiloli ijkuilitok: “In tlasojtlalistli tlen nikpia por mokalijtik nechtlatia kemi se tlitl.”

¹⁸ Ijkuakó in judiojtih okitlajtlanijkeh:

—¿Tlán tetzavkaneskayotl velis techititis para tikittaskeh nik yompa tlen tikchiva?

¹⁹ Jesús okinnankili:

—Xikxitinikah nin templo iva san ika eyi tonali oksemi niketzaltis.

²⁰ Ijkuakó in judiojtih okilvijkeh:

—Nin templo owejkajkeh okichijkeh ika ompoali ivan chikuase xivitl. ¿Iva te tikijtova san ika eyi tonali velis tiketzaltis oksemi?

²¹ Pero in templo tlen Jesús okijtovaya, kijtosneki yen ikuerpo.

²² Por eso, ijkuak Jesús omoyoliti, in momachtijkeh okilnamikeh tlen okijtojka, iva okineltokakeh tlen kijtova in Tiotlajkuiloli iva tlen Jesús okimilvijka.

Jesús nochtin kinmixmati itech inyolo

²³ Ijkuak Jesús okatka Jerusalén itech ilvitl de Pascua, miekeh okineltokakeh porke okimitakeh okinchivaya wejwei tetzavkaneskayomeh.

²⁴ Pero Jesús mach omokonfiarovaya de yejvah, porke Ye okinmixmatia itech inyolo.

²⁵ Mach omonekia íkka ma kilvi tlán kiyejyekovah in taltikpaktlakah, porke Ye kuali yokimatia tlán kipiah itech inyolo.

3

Jesús ivan Nicodemo

¹ Okatka se tlakatl fariseo itoka Nicodemo, okatka se de tlen tlayakankeh judiojtih.

² Nicodemo oyá okittato in Jesús de yovak, iva okilvi:

—Tlamachtí, kualí tikmatih ník Díos omítzvaltítlanki techmachtiki, porke amo oveliskia otikinichivaskia ninmeh tetzavkaneskayomeh, tla Díos amo mova oyeskia.

³ Jesús okilvi:

—Yi neli nimitzilvia, akin amo nesis oksemi, amo velis kittas kan Díos tlanavatia.

⁴ Nicodemo okitlajtlani:

—Pero ¿kenik velis se tlakatl nesis oksemi tla yi veve? ¿Kox velis oksé welta kalakis ijtik imama iva nesis oksemi?

⁵ Jesús okinankili:

—Yi neli nimitzilvia, akin amo nesis de atl iva de Tioijyotzintli, amo velis kalakis kan Dios tlanavatia.

⁶ Ijkuak nesi se konetl, kipia inakayo iva iomio kemi itajvah, pero tlen nesi de Tioijyotzintli, kijtosneki nesi ika se yankuik nemilistli de Tioijyotzintli.

⁷ Amo sa xitlatlachia por nimitzilvia: “Nochtin kipiah de nesiskeh oksemi.”

⁸ In ejekatl yavi san kan ye kineki. Iva tikkaki ijkyuka, pero amo tikmati kan valeva iva nion kan ik yavi. Ijkó noijki nochtin tlen nesih itech Tioijyotzintli.

⁹ Nicodemo oksemi okitlajtlani in Jesús:

—¿Iva yejón kenomi?

¹⁰ Jesús okinankili:

—¿Te tiwei titlamachti de Israel iva amo tika-
jsikamati?

¹¹ Yi neli nimitzilvia, tejavah tikijtovah tlen tikmatih, iva titetlapoviah de tlen yotikittakeh, pero imejavah amo inkineltokah tlan timechilviah.

¹² Tla Ne nimechtlapovia itla tlamantli tlen tlamochiva itech nin tlaltikpaktli, iva amo in-
nechneltokah, ¿kenik velis innechneltokaskeh tla nimechtlapovis tlen tlamochiva itech ilvikak?

¹³ 'Mach ika semi tlejko ilvikak, sino san yen tlen ovaltemok de ilvikak, kijtosneki, yen iKone in Tlakatl.

¹⁴ Iva ijkó kemi Moisés okajkuanki in kovatl kan tlavaki, ijkó noijki moneki kajkuanaskeh iKone in Tlakatl,

¹⁵ para nochtin tlen kineltokaskeh amo ma moixpolokah, sino ma yolitokah para semijjak.

Dios sa tlawel kintlasojtla in tlaltikpaktlakah

¹⁶ 'Dios sa tlawel kintlasojtla in tlaltikpaktlakah, iva por eso okitemakak tlen san Ye se iKone, para nochtin tlen kineltokaskeh amo ma moixpolokah, sino ma kipiakah nemilistli para semijjak.

¹⁷ Dios amo okivaltitlanki iKone para kintlajtlakoltis in tlaltikpaktlakah, sino okivaltitlanki para ma kinmakixti.

¹⁸ 'Tlen kineltoka iKone toTajtzin Dios, amo kitlajtlakoltiskeh. Pero tlen amo kineltoka, Dios kitlajtlakoltis porke amo kineltoka tlen san Ye se iKone toTajtzin Dios.

¹⁹ Tlen amo kineltokah, Dios kintlajtlakoltis, porke in tlavili ovala itech nin tlaltikpaktli, pero in tlaltikpaktlakah okachi okivelitakeh yeskeh kan tlayova iva amo kan tlanestok, porke kichivah tlen amo kuali.

²⁰ Nochtin tlen kichivah tlen amo kuali, kijosneki kikualankaitah in tlavili iva amo motokiah kan tlavili, para amo ma motta nik amo kuali tlen kichivah.

²¹ Pero tlen kichivah tlen melajkayotl motokiah kan tlavili, para ma motta nik kichijtokeh tlen Dios kimonekiltia.

Juan tlen tlabautisaro oksemi otetlapovi de Jesús

²² Okachi satepa, Jesús ivan momachtijkeh oyajkeh itech tlali de Judea, iva ompa omokajkeh kana keski tonali, iva okinbautisaro miekeh tlakah.

²³ Juan noijki otlabautisarojtoka itech altepetl de Enón, tlen kajki inakastla in altepetl de Salim, porke ompa okatka miek atl. Iva miekeh gentejtih oyayah inavak Juan iva ye okinbautisarovaya.

²⁴ Itech yejonmeh tonaltih Juan ayamo okitzakuayah telpiloya.

²⁵ Ijkuakó sekimeh momachtijkeh de Juan ope motlatlajtolnamikih ivan sekimeh judiojtih de kenik se moyolchipavas inavak Dios.

²⁶ Ijkuakó okilvitoh in Juan:

—Tlamachtí, in tlakatl tlen okatka mova ik nepa lado de kan weyatl Jordán, de tlen tejwatzi otechtlapovi, axka noijki yi tlabautisarova, iva nochtin yope yavíh inavak.

²⁷ Juan okinnankili:

—Se tlakatl amo velis itla kichivas tla Dios amo kinavatia ma kichiva.

²⁸ Imejvah mismo onnechkakeh onimechilvi nik mach ne niCristo, sino Dios onechvaltitlanki antes de vitz in Cristo.

²⁹ Kan monamiktiah, in novio kajki inakastla in novia, iva iyolikni in novio paki sa tlawel ijkuak kikaki tlapova in novio. Ijkó ne noijki axka nipaki porke nika kajki in Jesús.

³⁰ Ye okachi moweichijtias, iva ne nitemotias ayakmo niweititos.

Jesús vaevatok de ilvikak

³¹ 'Tlen ovala de ilvikak amo onka oksé kemi Ye porke Ye okachi tlayakantok itech nochi. In tlaltikpaktlakah, tlapovah de tlen onka itech nin tlaltikpaktli. Pero tlen ovala de ilvikak amo onka oksé kemi Ye porke Ye okachi tlayakantok itech nochi.

³² Ye kitematiltia de tlen yokittak iva tlen yokikakki, pero amika kineltokilia tlen Ye kijtova.

³³ Pero tlen kineltokilia, kajsikamati nik in Dios kijtova tlen yi neli melajka.

³⁴ Iva ijkuak iKone in Dios tlajtova, kijtosneki yen Dios techtlapovia, porke in Tioijyotzintli kajki itech iKone ika nochi ivelitilis porke Dios mach kitemaka iTioijyotzi san tzikitzi.

³⁵ ToTajtzin Dios kitlasojtla iKone, iva okimakak ma kinavati nochi tlen onka.

³⁶ Tlen kineltokas iKone toTajtzin Dios yolitos para semijkak. Pero tlen amo kineki kineltokas iKone toTajtzin Dios, mach yolitos para semijkak sino ipan vitz ikualanilis in Dios.

4

Jesús omotlapovi ivan se sivatl de Samaria

¹ Jesús okimatki ke in fariseos yope motlapoviah de Ye. In fariseos okimatkeh nik yope okachi momiekiliah in momachtijkeh de Jesús iva okachi miekeh yokinbautisarovaya ke Juan.

² Pero mach yen Jesús okinbautisarovaya, sino tlen okinmachiaya.

³ Por eso, ijkuak Jesús okimatki tlen omotlapoviayah, okiski itech tlali de Judea iva omokuapki oksemi itech tlali de Galilea.

⁴ Iva Jesús okipiaya tlen panos ik tlali de Samaria.

⁵ Ijkó pues, Jesús oajsito itech se altepetl de Samaria itoka Sicar, serka de kan tlali tlen yi wejkavitl Jacob okimakak ipiltzi José.

⁶ Ompa kan okatka in poso de Jacob. Jesús osotlavak de onejnenki iva omotlali inakastla yejón poso. Okatka kemi tlajko tonali.

⁷⁻⁸ Mientras in momachtijkeh oyajkeh itech se altepetl okikovatoh tlen kikuaskeh. Ijkuakó se sivatl de Samaria ovala okikixtiko atl kan poso. Iva Jesús okilvi:

—Techtliokoli seki moatzi.

⁹ In sivatl de Samaria okinankili:

—¿Tleka techtlajtlanilia ma nimitzmaka atl? ¿Amo tikmati ke ne de Samaria iva tejwatzi de Judea?

(Ijkó okijto porke in judiojtih amo movikah ivan samaritanos.)

¹⁰ Iva Jesús okinankili:

—Te mach tikmati tlen Dios kineki mitzmakas ivan amo tikmati akin mitztlajtlanilia atl. Tla otikmatiskia, tonses te otiktajtlaniliskia yen ma nimitzmaka atl, iva ye onimitzmakaskia atl tlen kitemaka nemilistli.

¹¹ In sivatl okilvi:

—Tejwatzi, in poso sa tlawel wejkatla iva amo tikpia tlan ika tikixtis atl. ¿Kan tikuiti in atl tlen kitemaka nemilistli?

¹² Tlen yowejka oyá tokojkol Jacob otechkajtevíli nin poso. Ye ivan ipilvah ivan iyolkavah nika oatlikeh. ¿Tejwatzi okachi tiweititok ke Jacob?

¹³ Jesús okinankili:

—Nochtin tlen nika atlih, oksemi amikiskeh.

¹⁴ Pero tlen konis atl tlen Ne nirkmakas, mach ok semi amikis. Porke in atl tlen Ne nirkmakas yetos kemi se ameyali tlen meyatos itech iyolo iva kimakas nemilistli para semijkak.

¹⁵ Ijkuakó in sivatl okilvi:

—Tejwatzi, techmaka yejón atl para ayakmo semi namikis, iva ayakmo semi ma nikixtiki atl ijtik nin poso.

¹⁶ Jesús okilvi:

—Xivia xiknotzati mototata iva nika xikvalika.

¹⁷ In sivatl okinankili:

—Ne mach nikpia nototata.

Jesús okilvi:

—Yi neli tlen tikijtova, nik amo tikpia mototata.

¹⁸ Porke yotikinpatlak makuiltih tlakah, iva tlen axka ivan tika noijki amo mototata. Yi neli tlen tikijtova.

¹⁹ In sivatl okilvi in Jesús:

—Tejwatzi nesi kemi titiotenejmachtli.

²⁰ Tlen achto tokojkolvah okiweijkachivayah in Dios itech nin tepetl. Pero imejvah tlen de Judea inkijtovah ke tikpiah de tikweijkachivaskeh in Dios kan ciudad de Jerusalén.

²¹ Jesús okinankili:

—Sivatl, moneki techneltoka. Ajsis tonali, mach ok monekis invitzehe itech nin tepetl, iva nion mach ok monekis inyaskeh asta Jerusalén para ompa inkiweijkachivatih in toTajtzin Dios.

²² Imejvah insamaritanos mach inkimatih akin inkiweijkachivah, pero tejvah tijudiojtih tikmatih akin tikweijkachivah, porke por yejvan

judiojtih ovala itlajtol in Dios para ma kimatikah in tlaltikpaktlakah kenik velis momakixtiskeh de intlajtlakol.

²³ Pero ajsis tonali ijkuak in tlaltikpaktlakah kiweijkachivaskeh in toTajtzin Dios ika Tioijyotzintli iva ika melajkayotl, iva axka yejón tonali yoajsiko. ToTajtzin Dios kineki ijkó ma kichivakah tlen kiweijkachivah.

²⁴ Dios Ye Tioijyotzintli, iva tlen kiweijkachivah moneki ma kiweijkachivakah ika Tioijyotzintli iva ika melajkayotl.

²⁵ In sivatl okilvi:

—Ne nikmati nik vitz in Mesías —kijosneki Cristo—, iva ijkuak Ye vitz, techajsikamatiltis nochi tlamantli.

²⁶ Jesús okinankili:

—Neká yen Ne, tlen axka nika mova nimotlapovijtok.

²⁷ Ijkuakó oajsikoh in momachtijkeh iva sa otlatlachixkeh ijkuak okittakeh in Jesús motlapovijtok ivan se sivatl. Pero amika omixevi okitlajtlani tlán okinekia yejón sivatl, o noso de tlán omotlapoviayah.

²⁸ Ijkuakó in sivatl okikajte iaxoktzi iva oyá totoka kan altepetl okinmilvito in gentejtih:

²⁹ —Xivikikah, xikittakih se tlakatl tlen onechilvi nochi tlen onikchi. ¡Xamo yen Cristo!

³⁰ Ijkuakó in gente de yejón altepetl okiskeh okittatoh in Jesús.

³¹ Yejón ora in momachtijkeh okitlatlavtiayah in Jesús:

—Tlamachti, ximotlamajsevi.

³² Pero Ye okinmilvi:

—In tlakuali tlen Ne nikmomajsevis imejvah amo inkixmatih.

³³ Ijkuakó in momachtijkeh ope motlatlajtlaniah:

—¿Xamo íkka itla okaviliko tlen kikuas?

³⁴ Pero Jesús okinmilvi:

—Notlakual kijtosneki ma nikchiva tlen kimonekiltia tlen onechvaltítlanki, iva ma niktítlami in tekitl tlen Ye onechnavati ma nikchiva.

³⁵ Ijkuak intookah imejvah inkijtovah: “Ok polivi navi metztli para se pixkas.” Pero Ne nimechilvia: Quali xikintlapokah inmoixtololovah iva xikinmitakah in gentejtih, kateh kemi oyeskia se tlali kan tlananik kan yotlachikavak iva yi kuali ka para se pixkas.

³⁶ Tlen pixka kipia itlaxtlavil, iva in tlakilotl tlen kipixka yejvan gentejtih tlen yolitoskeh para semijkak. Iva ijko, tlen tookas iva tlen pixkas, san sekka pakiskeh.

³⁷ Yi neli kemi kijtova in tlajtoli: “Se tooka iva oksé pixka.”

³⁸ Ne onimechtítlanki xipixkatih kan imejvah amitla onmotekimakakeh ontookakeh. Oksekimeh otlajyovijkeh otekipanojkeh, pero axka imejvah sa inkipakittah tlen yejvah yokichijkeh ika intekiv.

³⁹ Miekeh samaritanos otlaneltokakeh inavak Jesús porke in sivatl okinmilvi: “Ye onechilvi nochí tlen yonikchi.”

⁴⁰ Por eso ijkuak in samaritanos ovalajkeh inavak Jesús, okitlatlavtijkeh ma mokava invah. Iva Ye ompa omoka ome tonali.

⁴¹ Iva okachi miekeh okineltokakeh in Jesús por tlen Ye inevia okinmilvi.

⁴² Iva okilvijkeh in sivatl:

—Axka tikneltokah amo san por tlen te otechilvi, sino porke toneviah yotikakkeh, iva axka kuali tikmatih nik yi neli yen Cristo, tlen kinmakixtis in tlaltikpaktlakah.

Jesús okipajti ipiltzi se tekiva

⁴³ Ome tonali satepa, Jesús okiski de Samaria iva oyá kan tlali de Galilea.

⁴⁴ Jesús se welta okijto ke se tiotenejmachti mach kitlakitah itech ialtepe.

⁴⁵ Ijkuak Jesús oajsito Galilea, in gentejtih okiselijkeh ika pakilstli, porke in gentejtih de Galilea oviah Jerusalén iva ompa okittakeh nochi tlen Jesús okichi itech ilvitl de Pascua.

⁴⁶ Ijkuakó Jesús omokuapki oksemi kan altepetl de Caná tlen kajki itech tlali de Galilea, kan okikuapki vino in atl. Itech altepetl de Capernaum okatka se tekiva tlen otekipanovaya inavak in wei tlanavati, iva okipiaya se ipiltzi mokokova.

⁴⁷ Ijkuak in tekiva okimatki nik in Jesús yomokuapato de Judea iva yoajsiko Galilea, oyá para Caná okittato in Jesús. Okitlatlavi ma kivika para Capernaum ma kipajtiliti ipiltzi porke yi mero ixpolivi.

⁴⁸ Ijkuakó Jesús okilvi:

—Imejvah amo intlaneltokah, tla amo inkinmitah neskayomeh o noso tetzavimeh.

⁴⁹ Pero in tekiva tlen otekipanovaya inavak in wei tlanavati okilvi:

—San nima xiviki tejwatzi antes de ixpolivis nopiltzi.

⁵⁰ Ijkuakó Jesús okinankili:

—Ximokuapa mokalijtik, mopiltzi yopajtik.

In tlakatl okineltokak tlen Jesús okilvi, iva omokuapki para ikalijtik.

⁵¹ Ijkuak in tekiva ya onajsia ikalijtik, sekimeh itlakevalvah okinamikitoh iva okilvijkeh:

—Mopiltzi yopajtik.

⁵² Ijkuakó ye okintlajtlani kemi tlán ora ope mijmati ipiltzi. Iva yejvah okilvijkeh:

—Yala, kemi la una de tiotlaki okiski in totonik.

⁵³ Ijkuakó in teta okilnamiki ke mero itech yejón ora Jesús okilvi: “Mopiltzi yopajtik.” Ye iva nochi ifamilia okineltokakeh in Jesús.

⁵⁴ Ika nin, Jesús yi ojpa okichi yejón tetza-vkaneskayotl itech tlali de Galilea, okichi satepa de ovala de kan tlali de Judea.

5

Jesús okipajti se tlakatl tlen amo ovelia onej-nemia

¹ Satepa, Jesús oyá Jerusalén iva itech yejon-meh tonaltih in judiojtih okichivayah se ilvitl.

² Ompa Jerusalén, serka de kan kilviah kaltentli de ichkameh, okatka se tanke tlen ika tlajtoli hebreo kilviah Betesda, iva kan yejón tanke okatkah makuiltih korredortih.

³ Ompa ovettokah miekeh kokoxkeh. Ompa okatkah sekimeh tlen amo otlachiyah, sekimeh koxomeh iva sekimeh tlen amo oveliah onej-nemiah, yejvah okichiyah ma molini in atl.

⁴ Porke san kivalchiva se ilvikaktlatitlanili ovaltemovaya iva okoliniaya in atl, iva san akin achto okalakia, opajtia de san tlan kokolistli.

⁵ Ompa ovettoka se tlakatl tlen yokipiaya senpoali ivan kaxtoli ivan eyi xivitl mokokova.

⁶ Ijkuak Jesús okittak in kokoxki ompa ovettoka iva okimatki nik yi kipia miek xivitl mokokova, okilvi:

—¿Tikneki tipajtis?

⁷ In kokoxki okinankili:

—Tejwatzi, amo nikpia akin nechkalakis ijtik tanke ijkuak molinia in atl. Iva nochipa ijkuak nikneki nikalakis, oksé achto kalaktivetzi.

⁸ Jesús okilvi:

—Ximeva, xikololo mopetl iva xinejnemi.

⁹ Yejón tlakatl san nima ovalpajtik, okololo ipetl iva ope nejnemi. Pero komo okatka sábadó,

¹⁰ in tlayakankeh judiojtih okilvijkeh in tlakatl tlen opajtik:

—Axka sábadó, amo xikmama mopetl porke in tlanavatili amo kitekavilia.

¹¹ In tlakatl okinnankili:

—In tlakatl tlen onechpajti onechilvi: “Xikololo mopetl iva xinejnemi.”

¹² Ijkuakó okitlajtlanijkeh:

—¿Akin yejón tlakatl tlen omitzilvi: “Xikololo mopetl iva xinejnemi”?

¹³ Pero in tlakatl tlen opajtik amo okimatia akin okipajti, porke ompa okatkah miekeh genjetih iva Jesús ayakmo ompa okatka.

¹⁴ Okachi satepa Jesús oksemi okajsito in tlakatl kan templo iva okilvi:

—Techkaki, axka yotipajtik, ayakmo xikchiva tlajtlakoli, porke velis mitzpanos itla oksé tlamantli okachi temavti.

¹⁵ In tlakatl oyá okinmilvito in tlayakankeh judiojtih nik yen Jesús okipajti.

¹⁶ Por eso, in tlayakankeh judiojtih san tlen amo ope kitoktiah in Jesús iva okinekiah kix-poloskeh, porke okinchivaya tetzavimeh maski sábado.

¹⁷ Pero Jesús okinmilvi:

—NoTajtzi nochipa tekipanova kichiva tlen kuali, por eso Ne noijki ijko nikchiva.

¹⁸ Ijkuak ijko okinmilvi, in tlayakankeh judiojtih okachi okualankeh iva okinekiah kix-poloskeh. Amo okinekiah porke amo okitlakitaya in sábado, iva porke okijtovaya ke in Dios yen iTajtzi, iva por eso Ye noijki Dios.

iKone in Dios itlanavatijkayo

¹⁹ Jesús okinmilvi:

—Yi neli nimechilvia: iKone in Dios, mach itla velis kichivas san tlen Ye kinekis, sino Ye kichiva tlen kitta kichiva iTajtzi. Nochi tlen kichiva iTajtzi Ye noijki ijko kichiva.

²⁰ iTajtzi kitlasojtla iva kititia nochi tlen Ye kichiva, iva kititis okachi wejwei tlamantih iva amo kemi ninmeh iva imejvah sa intlatlachiaskeh.

²¹ Ijko kemi iTajtzi kinyolitia tlen yomikkeh iva kinmaka nemilistli, ijko noijki iKone kinmaka nemilistli tlen Ye kineki kinmakas.

²² iTajtzi amo kijtova akin tlajtlakole, sino Ye okitlali iKone yen ma kijto akin tlajtlakole,

²³ para ijko nochtin tlaltikpaktlakah ma kitlakitakah iKone ijko kemi kitlakitah iTajtzi. Tlen amo kitlakita iKone in Dios, kijtosneki noijki amo kitlakita in iTajtzi tlen okivaltitlanki.

²⁴ 'Yi neli nimechilvia: Tlen kikaki notlajtol iva kineltoka tlen onechvaltlanke, yolitos para semijkak. Ayakmo kitlajtlakoltiskeh, porke yokiski de kan mikilistli iva axka yi kipia yankuik nemilistli.

²⁵ Yi neli nimechilvia, ajsiki tonali, iva yejón tonali yoajsiko. Axka, tlen kateh kemi oyeskia yomikkeh kikakiskeh itlajtol iKone in Dios, iva tla kichivaskeh tlen kijtova, kiplaskeh nemilistli para semijkak.

²⁶ Ijkó kemi iTajtzi kipia nemilistli iva veli kitemaka nemilistli, ijkó noijsi okichi ke iKone ma kipia nemilistli iva ma kitemaka nemilistli.

²⁷ Noijsi okitlali Ye ma kijto akinmeh tlajtlakolejkeh de nochtin gentejtih, porke Ye mochi-jtok iKone in Tlakatl.

²⁸ Amo sa ximotlatchialtikah de tlen nimechilvia, porke ajsis tonali ijkuak nochtin tlen toktokeh kikakiskeh itlajtol,

²⁹ iva kisaskeh de kan toktokeh. Tlen okichijkeh tlen kuali, moyolitiskeh iva yeskeh ivan Dios para semijkak. Pero tlen okichijkeh tlen amo kuali, moyolitiskeh para kintlajtlakoltiskeh.

Jesús otlajto de Ye iva de Juan

³⁰ 'Ne amitla nikchiva tlen san Ne ma nikmoyeyjekoli. Ne nikijtova akin tlajtlakole ijkó kemi noTajtzi nechilvia. Iva nikijtova akin tlajtlakole ijkó kemi kipia de yetos porke amo nikchiva san tlen Ne nikneki, sino tlen kimonekiltia noTajtzi tlen onechvaltlanke.

³¹ Tla onimechtlapoviskia de itla, tlen san Ne notech onikixtiskia, tonses amo ovaleroskia kemi se prueba nik yi neli tlen nimechtlapovia.

³² Onka oksé akin tetlapovia de Ne, iva nikmati ke tlen Ye tetlapovia de Ne, yi neli.

³³ Imevjah onkintitlankeh sekimeh tlakah ma kitlajtlaniitih in Juan akin ye, iva ye okijto tlen yi neli aserka de Ne.

³⁴ Pero mach moneki íkka tlakatl ma imechilvi akin Ne, sino Ne san nimechilnamiktia tlen Juan okijto para techneltokakah iva ximomaxitkah.

³⁵ Juan okatka kemi se tlavili tlen oxotlatoka iva otlavijtoka, iva imejvah onpakeh kana keski tonali ika itlavil.

³⁶ Pero onka se tlamantli tlen okachi weititok ke tlen okijto in Juan iva yejón tlamantli kijtova akin Ne. Porke nochi tlen noTajtzi onechnavati ma nikchiva, iva tlen yi nikchijtok, nochi yejón tlamantli kiteititia nik yi neli noTajtzi onechvaltitlanki.

³⁷ NoTajtzi tlen onechvaltitlanki Ye noijki tlapova aserka de Ne, maski imejvah amo kema inkitenkakah ivan nion amo kema inkittah,

³⁸ iva nion itlajtol amo veli kalaki itech inmoyolo porke imejvah amo inkineltokah tlen Ye okivaltitlanki.

³⁹ Imevjah kualí inkimomachtiah in Tiotlajkuiloli, iva inkiyejekovah ke yejón Tiotlajkuiloli imechmakas nemilistli para semijkak. Pero yejón Tiotlajkuiloli tlajtova de Ne,

⁴⁰ iva imejvah amo inkinekih invitzeh nonavak para inkipiaskeh nemilistli para semijkak.

⁴¹ 'Weijkachivalistli tlen kisa de tlaltikpakt-lakah Ne amo nikselia.

⁴² Porke Ne kualí nimechixmati iva kualí nikmati nik mach inkipiah itlasojtlalis in Dios itech inmoyolo.

⁴³ Ne onivala ika itoka noTajtzi, iva imejvah amo innechseliah. Pero tla vitz íkka oksé ika ye itoka, imejvah yej yen okachi inkiseliah.

⁴⁴ Imejvah inkivelitah kualí ma imechtlakitakah in taltikpaktlakah, pero amo inkitemovah kenik velis imechtlakitas in Dios tlen san Ye se onka. Tonses, ¿kenik velis innechneltokaskeh?

⁴⁵ Amo xikyeyekokah ke Ne nimechteilvis in-avak noTajtzi, sino onka se akin imechteilvis, yen Moisés, porke imejvah inmotenmachiah itech tlen Moisés okijkuilo.

⁴⁶ Porke tla yi neli onkineltokaskiah tlen okijkuilo in Moisés, tonses imejvah onnechneltokaskiah, porke tlen ye okijkuilo tlapova de Ne.

⁴⁷ Pero tla imejvah amo inkineltokah tlen Moisés okijkuilo, ¿kenik velis inkineltokaskeh tlen Ne nimechilvia?

6

Jesús okintlamakak makuili mil tlakah (Mt. 14:13-21; Mr. 6:30-44; Lc. 9:10-17)

¹ Okachi satepa, Jesús oyá ik nepa lado de kan atl tlen wei de Galilea tlen noiiki itoka Tiberias.

² Miekeh gentejtih oyayah ivan Jesús, porke okittayah in wejwei tetzavkanes kayomeh tlen okinchivaya ijkuak okinpajtiaya in kokoxkeh.

³ Jesús otlejkok itech se tepetl iva ompa omotlali invan momachtijkeh.

⁴ Ijkuakó yi ajsitivitz inmilviv in judiojtih tlen itoka Pascua.

⁵ Ijkuak Jesús okittak nik miekeh gentejtih ope vitzeh inavak, okilvi in Felipe:

—¿Kan tikovativih pan para tikintlamakaskeh nochtin ninmeh gentejtih?

⁶ Ijkó okilvi in Felipe para kittas tlán kijtos, porke Jesús yokimatia tlán kichivas.

⁷ Ijkuakó Felipe okinankili:

—Tla tikovaskeh ome siento denario de pan, kemi tlen kitlani se tlakatl tlen tlapalevia chikome metztli, amo kajxilis nion para tikinmajmakaskeh ajachitzi.

⁸ Ijkuakó Andrés ikni in Simón Pedro, tlen noijki okatka momachti de Jesús, okijto:

⁹ —Nika kajki se telpotzintli kipixtok makuili pan de cebada iva ome michimeh, pero amo kajxilis para nochtin.

¹⁰ Ijkuakó Jesús okijto:

—Xikinmilvikah nochtin ma motlalihak.

Itech yejón lugar okatka sakayo, iva omotlali-
jkeh kemi makuili mil tlakah.

¹¹ Ijkuakó Jesús okontilanki in makuili pan iva okitlasojkamatki inavak Dios, satapa okinmakak in momachtijkeh, iva yejvah ope kinxejxeliliah nochtin tlen ompa oyejyetokah. Noijki ijkó okichi ika michimeh, iva nochtin kualí otlakuajkeh asta kan oixvikeh.

¹² Iva ijkuak nochtin yoixvikeh, Jesús okinmilvi in momachtijkeh:

—Xikololokah in pedasos tlen osobraro, amitla ma ijtlakavi.

¹³ In momachtijkeh okololojkeh in pedasos tlen osobraro de yejón makuili pan de cebada, iva okintemitijkeh majtlaktli ivan ome chikimeh.

¹⁴ Iva ijkuak in gentejtih okittakeh in wei tetzavkaneskayotl tlen Jesús okichi, okijtojkeh:

—Yi neli, ye nin tiotenejmachtli tlen otikchix-tokah ma viki itech nin tlaltikpaktli.

¹⁵ Pero Jesús okimomakak kuenta nik yejvah afuersa okinekiah kivikaskeh para ma yeto wei tlanavati. Por eso Jesús oksé welta oyá ipan tepetl para ompa yetos iselti.

*Jesús onejnenki ixko atl
(Mt. 14:22-27; Mr. 6:45-52)*

¹⁶ Ijkuak yotlayovak, in momachtijkeh otemokeh kan atl tlen wei de Galilea.

¹⁷ Otlejkokeh itech se barko iva ope nejnemih para panoskeh oksé lado para ajsitivih kan altepetl de Capernaum. Yotlayovak, iva Jesús ayamo yoejkoya.

¹⁸ Ijkuakó ope ejeka chikavak ivan atl ope motlatlaviteki.

¹⁹ Iva ijkuak yoyajkeh kemi se makuili o noso chikuase kilómetro itech atl, okittakeh in Jesús nejnentivitz ixko atl iva yokivalajsia in barko. Yejvah sa tlawel omomavtijkeh,

²⁰ pero Ye okinmilvi:

—Amo ximomavtikah, Ne niJesús.

²¹ Ijkuakó yejvah opakeh miek iva okitlejkoltijkeh itech barko. Iva san nima oajsitoh kan tlali kan yejvah oyayah.

In gentejtih okitemojkeh in Jesús

²² Omotlatik, in gentejtih tlen omokajkeh ik nepa lado de kan atl tlen wei, okilnamikah ke okatka san se barko, iva Jesús amo otlejkok ivan momachtijkeh, porke okinmitakeh ke in momachtijkeh oyajkeh inselti.

²³ Satepa, oksekimeh barkotih de altepetl de Tiberias, oajsikoh serka kan antes okikuaijkeh in pan satepa de ijkuak in toTeko okitlasojkamatki inavak Dios.

²⁴ Por eso, ijkuak in gentejtih okittakeh ke Jesús amo ompa okatka nion tlen momachtijkeh, otletlejkokeh itech sekimeh barkojtih iva oyajkeh okitemotoh kan altepetl de Capernaum.

Jesús yen pan tlen kitemaka nemilistli

²⁵ Iva ijkuak okajsitoh in Jesús ik nepa lado de kan atl tlen wei, okitlajtlanjkeh:

—Tlamachtí, ¿keman otajsiko nika?

²⁶ Pero Jesús okinmilvi:

—Yi neli nimechilvia, imejvah innechtemovah amo por onkajsikamatkeh tlán kijtosneki in tetzavkaneskayotl tlen onikchi, sino porke onimechtlamakak iva asta onmixvikeh.

²⁷ Amo xitekipanokah san por yen tlakuali tlen niman tlami, sino por yen tlakuali tlen amo keman tlami iva kitemaka nemilistli para semijkak. Yejón tlakuali velis imechmakas iKone in Tlakatl, porke toTajtzin Dios imechititia nik san yen iKone velis imechmakas yejón tlakuali.

²⁸ Yejvah okitlajtlanjkeh:

—¿Tlán kineki in Dios ma tikchivakah?

²⁹ Jesús okinnankili:

—Dios kineki imejvah techneltokakah porke Ye onechvaltílaniki. Yen yejón tlen Dios kineki xikchivakah.

³⁰ Yejvah okilvijkeh:

—¿Tlán tetzavkaneskayotl velis techititis para ma tikittakah iva ma timitzneltokakah? ¿Tlán velis tikchivas?

³¹ Tlen achto tokojkolvah okikujkeh in maná kan tlavaki, ijko kemi kijtova in Tiotlajkuiloli: “Pan de ilvikak okinmakak ma kikuakah.”

³² Jesús okinmilvi:

—Yi neli nimechilvia: Mach yen Moisés okinmakak in pan de ilvikak, sino yen noTajtzi okinmakak, yen kitemaka tlen yi neli pan de ilvikak.

³³ Porke in pan tlen Dios kitemaka yen tlen ovaltemok de ilvikak iva kinmaka nemilistli in tlaltikpaktlakah.

³⁴ Ijkuakó yejvah okilvijkeh:

—ToTeko, nochipa techmaka yejón pan.

³⁵ Jesús okinmilvi:

—Ne nipan tlen niktemaka nemilistli. Tlen vitz nonavak ayakmo keman tiojsivis. Iva tlen nechnehtokas ayakmo keman amikis.

³⁶ Pero ijko kemi yonimechilvi, maski imejvah yonnechitakeh amo innechnehtokah.

³⁷ Nochtin tlen noTajtzi nechinmakas yejvah nechtemoskeh iva vitzeh nonavak, iva amo niki-jtos ke amo nikinselis.

³⁸ Porke amo onivaltemok de ilvikak para nikchivas san tlen Ne nikneki, sino para nikchivas tlen kimonekiltia noTajtzi tlen onechvaltitlanki.

³⁹ Iva noTajtzi tlen onechvaltitlanki, amo kineki ma nikpolo nion se de nochtin tlen onechinmakak, sino kineki ma nikinyoliti itech neká tonali tlen yetos sa ik tlami.

⁴⁰ Pos tlen kimonekiltia noTajtzi tlen onechvaltitlanki yen nin: ke nochtin tlen kittaskeh

iKone in Dios iva tlaneltokaskeh inavak, kipi-
askeh nemilistli para semijkak. Iva Ne nikiny-
olitis itech neká tonali tlen yetos sa ik tlami.

⁴¹ Ijkuakó in tlayakankeh judiojtih ope tlapo-
vah en kontra de Jesús por okijto: “Ne nipan tlen
onivaltemok de ilvikak.”

⁴² Iva okijtojkeh:

—¿Amo ye nin Jesús, ipiltzi in José? Tejvah
tikixmatih ipapa iva imama. ¿Tos kenik kijtova
ke ovaltemok de ilvikak?

⁴³ Jesús okinmilvi:

—Ayakmo techpojpvakah por tlen
onimechilvi.

⁴⁴ Amika tlakatl velis vitz nonavak san por
kinekis, sino san yen noTajtzi tlen onechvalt-
lanki velis kichivas íkka tlakatl ma viki nonavak.
Iva Ne nikyolitis itech neká tonali tlen yetos sa ik
tlami.

⁴⁵ Itech intlajkuilol in tiotenejmachtijkeh ijkuil-
itok: “Dios kinmachtis nochtin.” Por eso, nochtin
tlen kikakiskeh noTajtzi iva kajsikamatiskeh tlen
kijtova, vitzeh nonavak.

⁴⁶ ‘Amo kijtosneki ke íkka yokittak noTajtzi.
San yen tlen ovala kan Ye kajki, yen yokittak.

⁴⁷ Yi neli nimechilvia, tlen nechneltoka kipia
nemilistli para semijkak.

⁴⁸ Ne nipan tlen niktemaka nemilistli.

⁴⁹ Tlen achto inmokojkolvah okikuajkeh in
pan tlen itoka maná kan tlavaki, iva maski
okikuajkeh, oixpolikeh.

⁵⁰ Pero tlen kikuah in pan tlen valtemotok de
ilvikak, amo ixpolivih.

⁵¹ Ne nipan tlen niktemaka nemilistli para semijkak tlen onivaltemok de ilvikak. Tlen kikuas nin pan, yolitos para semijkak. Iva nin pan tlen niktemakas, yen nokuerpo, para ijkó in taltikpaktlakah velis kipiaskah nemilistli para semijkak.

⁵² Ijkuakó in judiojtih ope motlatlajtolnamikih, okijtovayah:

—¿Kenik velis techmakas ikuerpo ma tikuakah?

⁵³ Jesús okinmilvi:

—Yi neli nimechilvia: Tla imejvah amo inkikuaskeh ikuerpo in iKone in Tlakatl iva tla amo inkoniskeh iesso, mach velis inkipiaskeh nemilistli para semijkak.

⁵⁴ Tlen kikua nokuerpo iva koni noesso, kipiaskah nemilistli para semijkak, iva Ne nikyolitis itech neká tonali tlen yetos sa ik tlami.

⁵⁵ Porque nokuerpo yi neli tlakuali, iva noesso yi neli tlakonili.

⁵⁶ Tlen kikua nokuerpo iva koni noesso, kijtosneki yolitok nonavak iva Ne niyolitok inavak.

⁵⁷ NoTajtzi tlen onechvaltblanki yen tlen kitemaka nemilistli iva Ne nikpia nemilistli por Ye. Ijkó noiiki tlen kimomajsevis nokuerpo, noiiki kipiaskah nemilistli nonavak.

⁵⁸ Ne nipan tlen onivaltemok de ilvikak, pero nin pan amo kemi in maná tlen okikuajkeh tlen achto inmokoikolvah iva satepa oixpolikeh. Tlen kikuas nin pan yolitos para semijkak.

⁵⁹ Ye nin tlen Jesús okinmacti in gentejtih ompa Capernaum kan tiotlamachtijkali.

Miekeh gentejtih okikajkeh in Jesús

⁶⁰ Ijkuak ijko okikakkeh, miekeh tlen onemiah ivan Jesús, okijtojkeh:

—Sa tlawel ovijtitok para se kajsikamatis. ¿Akin kineltokilis tlen kijtova!

⁶¹ Jesús okimatia nik amo okivelitakeh tlen okijto, iva okinmilvi:

—¿Inkualanilh por tlen nimechilvia?

⁶² ¿Tlán inkiyejyekoskeh imejvah tla inkitaskeh iKone in Tlakatl tlejkos ilvikak kan okatka?

⁶³ Tlen kitemaka nemilistli yen Tioijyotzintli, ikuerpo de se tlakatl amitla kipalevia para kimas nemilistli. Notlajtol tlen Ne yonimechilvi vitz de yen Tioijyotzintli iva por eso kitemaka nemilistli.

⁶⁴ Pero sekimeh de imejvah amo innechnel-tokah.

Jesús ijko okijto porke yokimatia desde antes akinmeh amo kineltokah iva akin kitemaktis.

⁶⁵ Iva okijto:

—Por eso, nimechilvia nik amika velis vitz nonavak, tla noTajtzi amo kimonekiltis.

⁶⁶ Desde ijkuakó, miekeh tlen onemiah ivan Jesús okikajkeh iva ayakmo onemiah Iva.

⁶⁷ Ijkuakó Jesús okintlajtlani in majtlaktli ivan ome momachtijkeh:

—¿Imejvah noijki inkinekih inyaskeh?

⁶⁸ Simón Pedro okinankili:

—NoTeko, ¿akin oksé inavak tiaskeh? San yen motlajtol kitemaka nemilistli para semijkak.

⁶⁹ Tejvah tikneltokah iva tikmatih nik tejwatzi tiyolchipavak tiiKone in Dios tlen yolitok.

⁷⁰ Ijkuakó Jesús okinnankili:

—Ne onimechpejpenki imejvah inmajtlaktih iva inmomeh, pero se de imejvah itlakeval in Amo Kualí Tlakatl.

⁷¹ Jesús otlajtovaya de Judas Iscariote ipiltzi in Simón, porke satepa ye okitemakti in Jesús maski okatka se de yejvah tlen majtlaktli ivan ome momachtijkeh.

7

Iknivah in Jesús amo okineltokayah

¹ Satepa de yejón, Jesús onemia itech tlali de Galilea. Mach okinekia nemis itech tlali de Judea, porke ompa sekimeh judiojtih okinekiah kixpoloskeh.

² Iva komo yi ajsiki inmilviv in judiojtih tlen itoka ilvitl de Sakakaltih,

³ iknivah in Jesús okilvijkeh:

—Amo ximokava nika, xivia kan tlali de Judea, para ke tlen tikinmachtia ma kittakah tlen tikchiva.

⁴ Porke se tlen kineki ma kixmatikah, mach kichiva itla tlamantli san ichtaka. Moneki xikinchiva tetzavkaneskayoméh inmixpa nochtin tlaltikpaktlakah para ijko nochtin ma kittakah tlen tikchiva.

⁵ Iknivah in Jesús ijko okilviayah, porke nion yejvah amo okineltokiliayah.

⁶ Ijkuakó Jesús okinmilvi:

—Mach ya ajsi noora para nias ompa, pero imejvah san tlan ora velis inyaskeh.

⁷ In tlaltikpaktlakah mach velis imechkualankaitaskeh, pero Ne

nechkualankaitah porke Ne nikinmilvia ke yejvah kichivah tlen amo kuali.

⁸ Imejvah xiviah ilvitl. Ne mach nias porke mach yi ajsi noora para nias ompa.

⁹ Satepa de ijkó okinmilvi, Jesús ompa omoka itech tlali de Galilea.

Jesús oyá ilvitl de Sakakaltih

¹⁰ Satepa, ijkuak iknivah in Jesús yoonevakeh ilvitl, Ye noijki oyá pero san ichtaka.

¹¹ In tlayakankeh judiojtih okitemovayah in Jesús ompa itech ilvitl iva omotlajtlaniayah:

—¿Kanin kajki neká tlakatl?

¹² Iva miekeh omotlapoviayah de Ye. Sekimeh okijtovayah: “Jesús yi neli tlakamela.” Pero oksekimeh okijtovayah: “Amo, porke san kinkajkayava in gentejtih.”

¹³ Pero amika omixeviaya tlajtos de Ye teixpa, porke okinmiimakasiah in tlayakankeh judiojtih.

¹⁴ Ijkuak yoyaya tlajko ilvitl, Jesús okalakki kan templo iva ope tlamachtia.

¹⁵ In tlayakankeh judiojtih sa otlatlachixkeh iva okijtovayah:

—¿Kenomi nin tlakatl sa tlawel kimati miek, iva nion amo omomachtí?

¹⁶ Jesús okinnankili:

—Notlamachtilis mach kisa de Ne, sino kisa de yen tlen onechvaltítlanki.

¹⁷ Tla íkka kinakis kichivas tlen Dios kimonekiltia, kajsikamatis notlamachtilis kox kisa de Dios, o noso nikijtova san tlen Ne nikmoyejyekolia.

¹⁸ Tlen tlajtova san tlen ye kimoyejyekolia, kijtosneki kineki kuali ma tlajtokah de ye. Pero

tlen kineki kuali ma tlajtakah de neká tlen okivaltitlanki, kijtosneki kijtova tlen yi neli iva amo tlakajkayava.

¹⁹ Moisés omechmakak in tlanavatili, iva nion se de imejvah amo kichiva tlen kijtova yejón tlanavatili. ¿Tleka pues inkinekih innechix-poloskeh?

²⁰ In gentejtih okinankilijkeh:

—Te tikpia se amo kuali ejekatl, ¿akin kineki mitzixpolos?

²¹ Jesús okinnankili:

—Nochtin imejvah sa intlatchiah san por onikpajti se kokoxki ijkuak sábado.

²² Moisés omechmakak in tlanavatili para ximosirkunsidarokah, maski yejón tlanavatili amo vlevatok de Moisés, sino vlevatok de inmokojkolvah tlen okachi achto opanokeh. Iva vleva imejvah inkisirkunsidarovah se konetl maski ma yeto sábado.

²³ Imejvah inkinekih inmokavaskeh kuali itech itlanavatil Moisés iva inkisirkunsidarovah se konetl maski sábado porke mero itech yejón tonali okitokaro mosirkunsidaros, tonses, ¿tleka inkualanih nova por onikpajti se tlakatl ijkuak sábado?

²⁴ Amo san nima xiktalajtlakoltikah se tlakatl san por imejvah xikmoyejyekolikah, sino xiktalajtlakoltikah tla yi neli inkimatih nik okichi tlen amo kuali.

Jesús okijto de kan ovala

²⁵ Ijkuakó sekimeh gentejtih de Jerusalén okimolviayah:

—¿Amo ye nin tlakatl tlen kitemojtinemih para kimiktiskeh?

²⁶ Pero, xikittakah, tlapojtok teixpa iva amitla kilviah. ¿Xamo in totlayakankavah yokimomakakeh kuenta ke nin tlakatl yen Cristo?

²⁷ Pero tejavah kualitimatih de kan ovala nin tlakatl. Pero ijkuak vitz in Cristo, amika kimatis de kan vitz.

²⁸ Jesús otlamachtijtoka kan templo, iva ijkuak ijkó okikakki, okijto chikavak:

—¡Imejvah inkijtovah innechixmatih iva inkimatih de kan onivala! Pero Ne amo onivala san por Ne oniknekki, sino onivala porke onechvaltitlanki noTajtzi tlen itech onka tlen melajkayotl, ivan tlen imejavah amo inkixmatih.

²⁹ Ne nikixmati porke Ne onivala de inavak, iva Ye onechvaltitlanki.

³⁰ Ijkuakó okinekiah kikitzkiskeh in Jesús. Pero amika omixevi okikitzki, porke ayamo oajsia iora para kikitzkiskeh.

³¹ Pero miekeh okineltokakeh, iva okijtovayah:

—Ijkuak vitz in Cristo, ¿kox kinchivas okachi wejwei tetzavkaneskayomeh ke nin tlakatl?

In fariseos okinekkeh kikitzkiskeh in Jesús

³² In fariseos okikakkeh tlen okijtovayah in gentejtih de yen Jesús, por eso yejvah omotlatlalvijkeh invan tlayakankeh tiopixkeh, iva okintitlankeh sekimeh templojmoyotih para ma kikitzkikah in Jesús.

³³ Ijkuakó Jesús okijto:

—Ne nietos inmovah sa kana keski tonali, satapa oksemi nimokuapas inavak noTajtzi tlen onechvaltitlanki.

³⁴ Imejvah innechtemoskeh, pero amo inechajsiskeh, porke mach velis inyaskeh kan Ne nias.

³⁵ Ijkuakó in tlayakankeh judiojtih omotlajtlanayah:

—¿Kan yas nin tlakatl kan tejvah amo velis tikajsiskeh? ¿Kox yas kan kateh in judiojtih tlen chantih itech oksekimeh países, iva noijki kinmachtis tlen amo judiojtih?

³⁶ ¿Tlán kijtosneki tlen otechilvi: “Innechtemoskeh pero mach innechajsiskeh, porke mach velis inyaskeh kan Ne nias”?

Ameyali tlen kitemaka nemilistli

³⁷ Sa ik tlami tonali de yejón ilvitl okatka okachi wei ilvitl. Jesús omoketzki iva chikavak okijto:

—Tla íkka amiki, ma viki nonavak iva ma atli.

³⁸ Kemi kijtova in Tiotlajkuiloli, tlen nechnel-tokas, tonses de itech iyolo kisas atl kemi se weyatl tlen kitemakas nemilistli para semijkak.

³⁹ Jesús ijko okijto kijtosneki akinmeh kineltokaskeh in Jesús kiseliskeh in Tioijyotzintli. Ijkuakó ayamo ovalaya in Tioijyotzintli porke in Jesús ayamo oyaya para ilvikak ika miek mavistilistli.

In gentejtih omoxexelojkeh

⁴⁰ Ijkuakó sekimeh tlen ompa okatkah, ijkuak okikakkeh nin tlajtoli, okijtojkeh:

—Yi neli, nin tlakatl yen tiotenejmachtli tlen otikchixtokah ma viki.

⁴¹ Sekimeh okijtovayah:

—Nin yen Cristo.

Pero oksekimeh okijtovayah:

—Mach neli porke in Cristo mach velis vitz de Galilea.

⁴² In Tiotlajkuiloli kijtova nik in Cristo kipia tlen valajtos de David, de altepetl de Belén kan ochantia in David.

⁴³ Ijkuakó, in gentejtih ope moxexelovah porke amo nochtin okineltokayah in Jesús.

⁴⁴ Sekimeh okinekiah kikitzkiskeh, pero amika omixevi okikitzi.

In wejwei tlanavatijkeh amo okineltokakeh in Jesús

⁴⁵ In templojmayoltih, omokuapkeh innavak in fariseos iva innavak in tlayakankeh tiopixkeh, iva okintlajtlanjikeh in templojmayoltih:

—¿Tleka amo onkivalikakeh?

⁴⁶ In templojmayoltih otlanankilijkeh:

—¡Amo kema tikkakih nion se tlakatl ma tlajto kemi Ye tlajtova!

⁴⁷ Ijkuakó in fariseos okinmilvijkeh in templojmayoltih:

—¿Noijki imejvah yomechkajkayah?

⁴⁸ ¿Kox íkka de totlayakankavah o noso íkka de tejevah tifariseos yotitlaneltokakeh inavak Jesús?

⁴⁹ Pero tlen amo kixmatih itlanavatil Moisés iva tlaneltokah inavak Jesús, Dios kintlajtlakoltis iva kintlajyoviltis.

⁵⁰ Se fariseo itoka Nicodemo, tlen okachi achto ovia okittato in Jesús de yovak, okinmilvi:

⁵¹ —Totlanavatil amo techkavilia ma tiktlajtlakoltikah se tlakatl, tla achto amo tikkakih tlan ika kiteilviah.

⁵² Yejvah okinankilijkeh:

—¿Te noijki xamo tivitz de Galilea? Kuali xikmomachti in Tiotlajkuiloli iva tikittas ke de Galilea amo keman kisa nion se tiotenejmachti.

⁵³ Iva ijkuakó nochtin ope yavih para inkalijtik.

8

Sivatl tlen okinpiaya imekavah

¹ Pero Jesús oyá kan Olivostepetl,

² iva omostlatik san kualka, oksemi oyá kan templo. Miekeh omotokijkeh inavak, iva Ye omotlali ope kinmachtia.

³ Ijkuak Jesús otlamachtijtoka, in tlamachtijkeh de itlanavatil Moisés iva in fariseos okivalik-ilijkeh se sivatl tlen okajsitoh ivan imekav itech tlajtlakoli. Yevvah okiketzkeh tlatlajkotia,

⁴ iva okilvijkeh in Jesús:

—Tlamachti, nin sivatl otikajsitoh ivan imekav itech tlajtlakoli.

⁵ Itlanavatil Moisés technavatia ma tikinmiktikah ika tetl in sivameh tlen ijko kichivah. Te, ¿tlán tikijtova?

⁶ Yevvah ijko okilvijkeh para kittaskeh tlán kichivas, iva ijko kipiaskeh tlen ika velis kiteilviskeh. Ijkuakó Jesús omotoolo iva ope tlajkuilova ipan tlali ika imajpil.

⁷ Pero komo okachi okitlajtlaniayah, Ye omoyekketzki iva okijto:

—Tla íkka de imejvah amo kipia nion se tlajtlakoli, yen achto ma kimaka ika tetl.

⁸ Jesús oksemi omotoolo iva oksemi ope tlajkuilova ipan tlali.

⁹ Pero ijkuak okikakkeh tlen Jesús okinmilvi, ijkuakó se por se ope yavíh porke kualí okimatiah ník yejvah noijki tlajtlakolejkeh. Achto ope yavíh tlen okachi yí vevemeh, iva omokajkeh sa yen Jesús ivan sivatl tlen ok ompa omoketoka.

¹⁰ Ijkuakó Jesús oksemi omoyekketzki iva okitlajtlani in sivatl:

—Sivatl, ¿kanin kateh tlen omitzteilviayah? ¿Ayakmika okijto ník moneki timikis?

¹¹ In sivatl okinankili:

—Amó, noTeko, ayakmika.

Ijkuakó Jesús okilvi:

—Nion Ne mach níkijtos ník moneki timikis. Axka xivia iva ayakmo xikchiva tlajtlakoli.

Jesús yen tlavili de nin taltikpaktli

¹² Jesús oksemi ope kintlapovia in gentejtih, okijto:

—Ne nika kemi nitlavili para níkintlavilis in taltikpaktlakah. Tlen vitz nonavak, kípías tlavili tlen kitemaka nemilistli, iva amo kema nemis kan tlayova.

¹³ In fariseos okilvijkeh:

—Tlen te tikjtova kisa san de te motlayejyekol. San te tikjtova ke yejón tlamantli yí neli. Tonses, yejón tlen tikjtova amitla ipati.

¹⁴ Jesús okinnankili:

—Tlen Ne níkijtova yí neli kípía ipati, maski kisa de Ne mismo. Porke Ne níkmati de kan onivala iva níkmati kan niav. Pero imejvah amo inkimatih de kan onivala iva nion amo inkimatih kan niav.

¹⁵ Imejvah intetlajtlakoltiah íjkó kemi kichivah in taltikpaktlakah. Ne amika níktlajtlakoltia.

¹⁶ Pero tla Ne nitetlajtlakoltis, nikchivas ika tlen yi neli melajka, porke amo nitetlajtlakoltia san Ne, sino nitetlajtlakoltia Ne ivan noTajtzi tlen onechvaltitlanki.

¹⁷ Itech imotlanavatil inkipiah ijkuilitok, ke ijkuak ome testigojtih san se tlajtoli kijtovah, tonses tlen kijtovah kipia ipati.

¹⁸ Ijkó pues, Ne nika kemi se testigo tlen nikijtova de Ne mismo, ivan noTajtzi tlen onechvaltitlanki kajki kemi oksé testigo.

¹⁹ Iva yejvah okitlajtlaniykeh:

—¿Kanin kajki moTajtzi?

Jesús okinnankili:

—Imejvah mach innechixmatih, nion amo inkixmatih noTajtzi. Tla imejvah onnechixmatiskiah, noiiki onkixmatiskiah noTajtzi.

²⁰ Jesús okijto nin tlajtoli ijkuak otlamachtijtoka kan templo kan okitlaliayah in ofrendajtomí. Iva amika okikitzki porke ayamo oajsia tonali para kikitzkiskeh.

Kan Ne nias imejvah amo velis inyaskeh

²¹ Jesús oksemi okinmilvi:

—Ne nias, iva imejvah innechtemoskeh, pero imejvah inmikiskeh porke ok inyeskeh intlajtlakolejkeh. Por eso, kan Ne nias, imejvah amo velis ompa inyaskeh.

²² In tlayakankeh judiojtih okijtojkeh:

—¿Xamo kineki momiktis, por eso kijtova ke kan Ye yas tejvah amo velis ompa tiaskeh?

²³ Ijkuakó Jesús okinmilvi:

—Imejvah de nika, pero Ne nivitz de tlakpak. Imejvah de nin tlaltikpaktli, pero Ne amo.

²⁴ Por eso onimechilvi ke imejvah inmikiskeh porke ok inyeskeh intlajtlakolejkeh. Porke tla imejvah amo inkineltokah nik Yen Ne niCristo, tonses imejvah inmikiskeh porke ok inyeskeh intlajtlakolejkeh.

²⁵ Ijkuakó oksemi okitlajtlanijkeh:

—¿Akin te?

Jesús okinnankili:

—Ne yonimechilvi desde achto akin Ne.

²⁶ Ne nikpia miek tlamantli tlen moneki nimechilvis en kontra de imejvah. Pero tlen onechvaltítlanki, kijtova tlen melajkayotl, iva tlen Ne nikinmilvia in taltikpaktlakah yen yejón noijki tlen Ne onikakki de Ye.

²⁷ Pero yejvah amo okajsikamatkeh ke Jesús okintlapoviaya de iTajtzi.

²⁸ Por eso Jesús okinmilvi:

—Ijkuak imejvah inkajkuanaskeh tlakpak para inkixpoloskeh iKone in Tlakatl, ijkuakó inkajsikamatiskeh nik Yen Ne niCristo. Iva inkajsikamatiskeh ke amitla nikchiva san tlan Ne nikmoyeyekolia, sino Ne nikijtova san yen tlen noTajtzi yonechmacthi.

²⁹ Porke tlen onechvaltítlanki nova kajki iva amo semi nechkava noselti, porke Ne nochipa nikchiva tlen Ye kipaktia.

³⁰ Ijkuak Jesús ijkó okinmilvi, miekeh okineltokakeh.

Tlen yi neli melajka techpalevia para ma tika-jkatokah

³¹ Ijkuakó Jesús okinmilvi in judiojtih tlen okineltokakeh:

—Tla imejvah nochipa inkichivaskeh tlen Ne nimechilvia, tonses yi neli inyeskeh inmomachtijkeh de Ne,

³² iva inkixmatischek tlen melajkayotl, iva tlen melajkayotl kichivas xikajkatokah.

³³ Yejvah okinankilijkeh:

—Tejvah tivalajtokeh de Abraham, iva mach kema ikka tikpiah kemi toteko, ¿kenik tikijtova in te ke tikajkatoskeh?

³⁴ Jesús okinmilvi:

—Yi neli nimechilvia, nochtin tlen kichivah tlajtlakoli, kijtosneki in tlajtlakoli yen inteko tlen kinnavatijtok.

³⁵ Se tlakatl tlen yokikojkeh para tekipanos inavak iteko mach kema povis kemi de familia, pero se tlakatl tlen tekone yejón semijkak povi de familia.

³⁶ Tonses, tla iKone in Dios imechkajkavas de inavak inmoteko tlen tlajtlakoli, tonses imejvah yi neli inkajkatoskeh.

³⁷ Kualí nikmati ke imejvah invalajtokeh de Abraham. Pero inkinekih innechixpoloskeh porke amo inkiseliah itech inmoyolo tlen Ne nimechilvia.

³⁸ Ne nimechtlapovia de tlen noTajtzi nechitia, iva imejvah inkichivah tlen inmopapa imechnavatia.

³⁹ Yejvah okilvijkeh:

—¡Tejvah topapa yen Abraham!

Pero Jesús okinnankili:

—Tla yi neli oyeskia intepilvah de Abraham, tonses onkichivaskiah tlen ye okichi.

⁴⁰ Pero maski yonimechilvi tlen yi neli tlen Dios nechititia, imejvah inkinekih innechixpoloskeh. ¡Abraham mach kema ijko okichi!

⁴¹ Imejvah inkichivah tlen kichiva inmopapa.

Yejvah okinankilijkeh:

—Tejvah mach tiichtakakonemeh, tejvah tikpiah san se topapa, yen Dios.

⁴² Jesús okinnankili:

—Tla yi neli oyeskia yen Dios inmopapa, on-nechtlasojtlaskiah, porke Ne nivitz de inavak Dios iva onivala itech nin tlaltikpaktli. Iva amo onivala san por Ne onikneki, sino porke Dios onechvaltitlanki.

⁴³ ¿Inkimatih tleka amo inkajsikamatih tlen Ne nimechilvia? Amo inkajsikamatih porke amo inkinekih inkikakiskeh notlajtol.

⁴⁴ Imejvah inmopapa yen Amo Quali Tlakatl, ivan imejvah inkichivah tlen ye kineki. In Amo Quali Tlakatl ye temikti desde ijkuak ope in tlaltikpaktli. Mach kema kijtova itla melajkayotl porke itech iyolo mach itla kipia tlen melajkayotl. Nochipa san tlakajkayava porke yen yejón itekiv, porke ipa tekajkaya, iva yen teta de nochtin tlen tlakajkayavah.

⁴⁵ Pero komo Ne nikijtova tlen yi neli, por eso imejvah amo innechneltokah.

⁴⁶ ¿Akin de imejvah velis kijtos ke nikpia itla tlajtlakoli? Iva tla Ne nikijtova tlen melajkayotl, ¿tleka amo innechneltokah?

⁴⁷ Se tekone de Dios, kichiva tlen Dios kilvia. Pero imejvah komo amo intepilvah de Dios, por eso amo inkichivah tlen Dios imechilvia.

Cristo yokatka antes de Abraham

⁴⁸ Ijkuakó sekimeh judiojtih okilvijkeh:

—Yompa tlen tejavah tikjto vah, te mach tikuali porke te de Samaria iva tikpia se amo kuali ejekatl.

⁴⁹ Jesús okinnankili:

—Ne mach nikpia nion se amo kuali ejekatl. Ne kuali nitlajtova de noTajtzi, pero imejavah intlajtovah amo kuali de Ne.

⁵⁰ Ne amo nikchiva ke in tlaltikpaktlakah kuali ma tlajtokah de Ne. Pero onka se tlen akin yi neli kineki kuali ma tlajtokah de Ne, iva yen jues.

⁵¹ Yi neli nimechilvia, tlen akin kichivas tlen Ne nikjtova, amo kema ixpolivis.

⁵² Ijkuakó in tlayakankeh judiojtih okinankilijkeh:

—Axka kema kuali tikmatih nik yi neli tikpia se amo kuali ejekatl. Abraham iva nochtin tiotenejmachtijkeh oixpolikeh, iva te tikjtova: “Tlen kichivas tlen Ne nikjtova, amo kema ixpolivis.”

⁵³ ¿Okachi tiweititok te ke topapa Abraham? Ye oixpolivik, iva in tiotenejmachtijkeh noijki oixpolikeh. ¿Akin timomachilia in te?

⁵⁴ Jesús okinnankili:

—Tla Ne onikchivaskia ke in tlaltikpaktlakah kuali ma tlajtokah de Ne, tonses amitla ipati oyeskia. Pero noTajtzi Ye kuali tlajtova de Ne, noTajtzi yen tlen imejavah inkjto vah yen inmoDios.

⁵⁵ Pero imejavah amo inkixmatih. Ne yi neli nikixmati, iva tla onikjtoskia nik amo nikixmati, onieskia noijki nitekajkaya kemi imejavah. Pero Ne yi neli nikixmati, iva nikchiva tlen Ye kijtova.

⁵⁶ Achto ijkuak okatka inmokojkol Abraham, ye sa tlawel opakki ijkuak okittak ke okachi tlayakapa nivitz itech nin tlaltikpaktli. Ye okittak iva sa tlawel opakki.

⁵⁷ Ijkuakó in tlayakankeh judiojtih okilvijkeh in Jesús:

—Ayamo tikpia ompoali ivan majtlaktli xivitl, ¿kenomi tikijtova ke otikittak in Abraham?

⁵⁸ Jesús okinnankili:

—Yi neli nimechilvia, antes de oyeskia in Abraham, Ne ipa yonikatka.

⁵⁹ Ijkuakó yejvah okonintilankeh sekimeh temeh para ika kimakaskeh, pero Jesús okalakki intzala in gentejtih omotlaati iva satepa okiski de kan templo iva oyá.

9

Jesús okipajti se tlakatl tlen amo otlachiaya

¹ Ijkuak Jesús opanovaya itech se ojtli, okittak se tlakatl tlen amo otlachiaya desde oneski.

² Iva in momachtijkeh okitlajtlanijkeh:

—Tlamachtli, ¿tleka ijkó oneski nin tlakatl? ¿Por okichijkeh tlajtlakoli itajvah, o noso porke ye okichi tlajtlakoli?

³ Jesús okinnankili:

—Mach por ye okichi tlajtlakoli o noso por itajvah okichijkeh tlajtlakoli, sino ijkó oneski para xikittakah kenomi ivelitilis in Dios velis kipajtis.

⁴ Mientras ok tlanestok, moneki tikchivaskeh in tekítl tlen noTajtzi onechvaltítlanki ma

nikchiva, porke ijkuak tlayovas ijkuakó amo ok íkka velis tekipanos.

⁵ Mientras Ne nika itech nin tlaltikpaktli, nika kemi se tlavili tlen kintlavilia in tlaltikpaktlakah.

⁶ Ijkuak Jesús ijko okijto, ochijchak ipan tlali, okipaaitli se tzikitzi tlali, iva okitlalili itech ittololovah in tlakatl tlen amo tlachia,

⁷ iva okilvi:

—Ximixamiti kan tanke Siloé —Siloé kijtosneki Tlatitlanili.

In tlakatl tlen amo otlachiaya omixamito, iva ijkuak ovalmokuapato, yi veli tlachia.

⁸ Ijkuakó ivesinojvah iva nochtin tlen achto okittayah okitlajtlania limosna, omotlajtlaniayah:

—¿Amo yen nin tlen omotlaliaya okitlajtlania limosna?

⁹ Sekimeh okijtovayah:

—Ajá ye.

Oksekimeh okijtovayah:

—Motta kemi ye, pero mach ye.

Pero ye inevia okinmilviaya:

—Ajá, ne.

¹⁰ Ijkuakó okitlajtlaniykeh:

—¿Kenik yi veli titlachia?

¹¹ Ye okinnankili:

—In tlakatl tlen itoka Jesús, okipaaitli se tzikitzi tlali, onechtlalili itech noixtololovah iva onechilvi: “Ximixamiti kan tanke Siloé.” Ne onia iva ijkuak onimixami, yovelik onitlachixki.

¹² Iva oksemi okitlajtlaniykeh:

—¿Kanin kajki yejón tlakatl?

Ye okinmilvi:

—Mach nikmati.

In fariseos okitlatzintokijkeh in tlakatl tlen amo otlachiaya

¹³ Ijkuakó in tlakatl tlen achto amo otlachiaya okivikakeh innavak in fariseos.

¹⁴ Okatka sábadó ijkuak Jesús okipaaitli in tlali iva okichi ma tlachia in tlakatl.

¹⁵ Ijkuakó in fariseos okitlajtlanjkeheh yejón tlakatl kenik otlachixki. Ye okinnankili:

—Okipaaitli se tzikitzi tlali, onechtlalili itech noixtololovah, onimixami, iva axka yi ntlachia.

¹⁶ Ijkuakó sekimeh fariseos okilvijkeh:

—Yejón tlakatl amo Dios okivaltitlanki, porke amo kitlakita in sábadó.

Pero oksekimeh okijtovayah:

—¿Kenik velis ijko kichivas se tlakatl tlen tlajtlakole?

Amo nochtin okatkah de akuerdo iva omoxex-elojkeh.

¹⁷ Ijkuakó oksemi okitlajtlanjkeheh in tlakatl tlen amo otlachiaya:

—¿Iva te tlán tikjtova de neká tlakatl tlen omiztlachialti?

Iva ye okinnankili:

—Ne nikjtova ke Ye se tiotenejmachti.

¹⁸ In tlayakankeh judiojtih mach okineltokayah kox yi neli amo otlachiaya. Por eso okinnotzkeh itajvah,

¹⁹ iva okintlajtlanjkeheh:

—¿Yen nin imopiltzi tlen imejvah inkjtovah amo otlachiaya ijkuak oneski? ¿Iva axka kenik yi tlachia?

²⁰ In tetajmeh otlanankilijkeh:

—Kuali tikmatih nik topiltzi, iva kuali tikmatih nik amo otlachiaya ijkuak oneski.

21 Pero amo tikmatih kenik yi veli tlachia iva nion amo tikmatih akin okitlachialti. Ye inevia xiktajtlaniikah, ya yi wei, ye velis imechilvis kenik opajtik.

22 In tetajmeh ijko otlanankilijkeh porke ok-inmiimakasiah in tlayakankeh judiojtih. Porke in tlayakankeh judiojtih yomotlatlalvijkah tla ikka kijtos ke Jesús yen Cristo, kikixtiskeh para semijkak de kan intiotlamachtijkal.

23 Por eso itajvah okijtojkeh: “Ye inevia xiktajtlaniikah, ya yi wei, mach ok konetl.”

24 Ijkuakó in tlayakankeh judiojtih oksemi okinotzkeh in tlakatl tlen amo otlachiaya, iva okilvijkeh:

—Techilvi tlen yi neli ixpan Dios. Tejvah tikmatih ke yejón tlakatl tlen omitzpajti, tlajtlakole.

25 Ijkuakó in tlakatl okinnankili:

—Ne mach nikmati kox tlajtlakole o noso amo. Lo ke tlen nikmati, es ke achto amo onitlachiaya iva axka ya yi nitlachia.

26 Iva oksemi okitajtlanijkeh:

—¿Tlán omitztokti? ¿Kenik omitztlachialti?

27 Ye okinnankili:

—Ne yonimechilvi iva amo innechkakih. ¿Tleka inkinekih oksemi ma nimechilvi? ¿Imejvah noijki inkinekih inyeskeh inmomachtijkeh de Ye?

28 Ijkuakó yevjah ope fiero kilviah, iva okilvijkeh:

—Te yotimochi timomachti de yejón tlakatl, pero tejvah timomachtijkeh de Moisés.

²⁹ Tejvah tikmatih nik in Dios okitlapovi in Moisés. Pero yejón tlakatl, mach tikmatih de kan ovala.

³⁰ Ijkuakó in tlakatl okinnankili:

—Amo nikneltoka tlen inkijtovah. Kenik imejvah amo inkimatih de kan ovala, iva ne asta yonechtlachialti.

³¹ Kuali tikmatih nik in Dios amo kinkaki tlen tlajtlakolejkeh. Dios kinkaki tlen kitlakitah iva kichivah tlen Ye kimonekiltia.

³² Desde ijkuak Dios okichi in tlaltikpaktli mach semi momati íkka tlakatl ma kitlachialti se tlen amo tlachia desde oneski.

³³ Tla nin tlakatl amo Dios okivaltitlanki, amitla oveliskia okichivaskia.

³⁴ Yejvah okilvijkeh:

—Te ipa titlajtlakole otoneski, ¿iva axka tikneki techmachtis?

Iva okikixtijkeh para semijkak de kan tiotlamachtijkali.

Tlen yi neli amo tlachiah

³⁵ Jesús okimatki ke in tlakatl tlen amo otlachia-aya okixtijkeh de kan tiotlamachtijkali, iva ijkuak okinamikki okilvi:

—¿Tikneltoka ikone in Dios?

³⁶ Ye okinankili:

—Tejwatzi, techilvi akin Ye para nikneltokas.

³⁷ Jesús okinankili:

—Yotikittak, yen Ne, tlen axka nika mova nimotlapovijtok.

³⁸ Ijkuakó in tlakatl omotlankuaketzki inavak Jesús, okimavistili iva okilvi:

—Ajá, noTeko, nimitzneltoka.

³⁹ Iva Jesús okilvi:

—Ne onivala itech nin tlaltikpaktli para nikinmilvis kox kuali o noso amo kuali tlen kichivah in tlaltikpaktlakah. Iva ijkó, tlen amo tlachiah ma tlachiakah iva tlen tlachiah ayakmo ma tlachiakah.

⁴⁰ Ijkuakó sekimeh fariseos tlen ompa okatkah, ijkuak ijkó okikakkeh okitlajtlanijkeh:

—¿Kijosneki tejavah noijki amo titlachiah?

⁴¹ Jesús okinnankili:

—Tla imejavah yi neli oyeskia amo intlachiah, tonses Dios amo omechtlajtlakoltiskia por yen inmotlajtlakol. Pero komo imejavah inkijtovah ke kuali intlachiah, tonses Dios imechtlajtlakoltis por yen inmotlajtlakol porke inkijtovah inki-matih tlen inkichivah.

10

Ejemplo de se ichkakorral

¹ 'Yi neli nimechilvia, tlen amo kalaki kan kaltentli de ichkakorral, sino tzikuini iva kalaki oksé lado, yejón kijtosneki ichtekki iva san yejón itekiv.

² Pero in tlajpixki kalaki kan kaltentli.

³ Tlen tlakuidarova kan kaltentli kitlatlapolia in tlajpixki para ma kalaki, iva iichkavah kitenkakah. In tlajpixki kinnotza iichkavah ika intoka, iva kinkixtia de ijtik inkorral.

⁴ Iva ijkuak nochtin yokinkixti iichkavah, kinvika kinyakana. Iva iichkavah kitokah porke kitenkakah.

⁵ Pero se tlen amo kixmatih mach ivan yavih, sino kicholiliah porke amo kitenkakah se tlen amo kixmatih.

⁶ Jesús okinmilvi nin ejemplo, pero yevvah amo okajsikamatkeh tlen Jesús okinekia ma kajsikamatikah.

Jesús yen kuali tlajpixki

⁷ Ijkuakó Jesús oksemi okinmilvi:

—Yi neli nimechilvia: Ne nika kemi se kaltentli kan kalakih ichkameh.

⁸ Nochtin tlen ovalajkeh antes de Ne nivitz, oyajkeh ichtekheh. Pero in ichkameh mach okintenkakeh ijkuak okinnotzkeh.

⁹ Ne nika kemi nikaltentli. Iva akin notech kalakis, momakixtis. Velis kalakis iva kisas kan kaltentli iva nochipa kajsis tlen kikuas.

¹⁰ 'In ichtekki vitz san para tlachtekis, para temiktis iva para teixpolos. Pero Ne onivala para ke in tlaltikpaktlakah ma kipiakah nemilstli, iva yejón nemilstli ma momiekili itech inyolo.

¹¹ Ne kuali nitlajpixki. Se tlen kuali tlajpixki kitemaka inemilis por iichkavah.

¹² Pero se tlen san tetlajpialia, ijkuak kitta vitz in koyotl, kinkakajteva in ichkameh iva cholova, porke mach yi neli tlajpixki iva mach iaxkavah in ichkameh. In koyotl kinkitzkia sekimeh ichkameh iva oksekimeh kinchochololtia.

¹³ In tlajpixki cholova porke san tetlajpialia iva kitlaxtlaviah, iva por eso amo kinchiva kuenta in ichkameh.

¹⁴ 'Ne kuali nitlajpixki iva nikinmixmati nochkavah, iva yevvah nechixmatih,

¹⁵ ijko kemi noTajtzi nechixmati iva Ne nikixmati noTajtzi. Ne niktemaka nonemilis por nochkavah.

¹⁶ Noijki nikipia oksekimeh ichkameh, tlen amo kateh ijtik nin korral iva moneki nikinvalikas noijki. Yejvah nechtenkakiskeh, iva nochtin yeskeh san sekka, iva yetos san se tlajpixki.

¹⁷ 'NoTajtzi nechtlasojtla, porke Ne nonevia niktemaka nonemilis, para ijko satepa oksemi nikpias nonemilis ijkuak nimoyolitis.

¹⁸ Amika velis nechkixtilis nonemilis, sino Ne nonevia niktemaka. Ne velis nikchivas de niktemakas nonemilis iva de nikpias oksemi nonemilis. NoTajtzi ijko onechnavati ma nikchiva.

¹⁹ In tlayakankeh judiojtih oksemi ope mokualaniah porke amo okatkah de akuerdo por tlen okijtovaya in Jesús.

²⁰ Sekimeh okijtovayah:

—Nin tlakatl kipia se amo kuali ejekatl iva yokuatlapolo. ¿Tlan para inkikakiliah?

²¹ Pero oksekimeh okijtovayah:

—Se tlakatl tlen kipia se amo kuali ejekatl amo ijko tlajtova. Se amo kuali ejekatl amo velis kitlachialtis se tlakatl tlen amo veli tlachia.

In tlayakankeh judiojtih amo okiselijkeh in Jesús

²² Ompa Jerusalén okichijtokah ilvitl tlen okichivayah kada xivitl para kilnamikih ijkuak okiyankuilijkeh in templo. Iva okatka mero ijkuak seva.

²³ Jesús ik ompa onemia kan templo, kan kilviah korredor de Salomón.

²⁴ Ijkuakó in tlayakankeh judiojtih okiyavalojkeh iva okitlajtlanijkeh:

—¿Asta keman kuali tikmatischeh akin te? Tla yi neli te tiCristo seppa techilvi.

²⁵ Jesús okinnankili:

—Ne yonimechilvi akin Ne, pero imejvah amo innechneltokah. Nochi tlen noTajtzi onechnavati ma nikchiva yen yejón nikchiva iva yejón kiteitia akin Ne.

²⁶ Pero imejvah amo innechneltokah, porke imejvah amo innochkavah, ijkó kemi achto yonimechilvi.

²⁷ Nochkavah nechtenkakah, iva Ne nikinmixmati iva yevah vitzeh nonavak.

²⁸ Ne nikinmaka nemilistli para semijkak. Amo kema mikiskeh, iva amika velis nechinkixtilis.

²⁹ NoTajtzi yen onechinmaktili, Ye okachi velitini ke nochtin, iva amika velis kinkixtilis.

³⁰ Ne ivan noTajtzi timochijtokeh san se.

³¹ Ijkuakó in tlayakankeh judiojtih oksemi okonintilankeh sekimeh temeh para ika kimakaskeh.

³² Iva Jesús okinmilvi:

—Inmoixpa nikchijtivitz miek tlamantli tlen kuali ika ivelitilis noTajtzi. ¿Katli yen tlamantli inkijtoskeh ke amo kuali tlen onikchi iva por eso innechmakaskeh ika tetl?

³³ In tlayakankeh judiojtih okinankilijkeh:

—Amo timitzmakaskeh ika tetl por tlen kuali yotikchi, sino porke titlapova kontra Dios. Te san titlakatl iva timoteneva tiDios.

³⁴ Jesús okinnankili:

—Itech inmotlanavatil kajki ijkuilitok kan Dios kijtova: “Ne onikijto imejvah indiosmeh.”

³⁵ Tikmatih ke tlen kijtova in Tiotlajkuiloli amo velis se kipatlas porke kijtova tlen yi neli, iva Dios okinnotzki diosmeh tlen okiselijkeh itlajtol.

³⁶ Iva tla Dios onechpejpenki iva onechvalti-tlanki itech nin tlaltikpaktli, tonses, ¿kenomi imejvah inkijtovah ke nitlapova kontra Dios por onikijto nik Ne niiKone in Dios?

³⁷ Tla amo nikinchiya in chivalistih kemi noTajtzi kinchiya, amo techneltokilikah.

³⁸ Pero tla nikinchiya, tonses maski Ne amo techneltokilikah, sino xikinneltokakah in chivalistih tlen nikinchiya, para ijkó kuali xikmatikah ke noTajtzi yi neli nova kajki iva Ne nika Iva.

³⁹ Oksemi okinekiah kikitzkiskeh, pero Jesús okincholili.

⁴⁰ Ijkuakó Jesús oksemi oyá ik nepa lado de kan weyatl Jordán, kan achto in Juan otlabautisarovaya iva ompa omoka.

⁴¹ Iva miekeh oyajkeh ompa okittatoh in Jesús iva okijtovayah:

—Maski in Juan amo okichi nion se tetzavkaneskayotl, pero nochi tlen okijto de nin tlakatl yi neli melajka.

⁴² Iva miekeh otlaneltokakeh inavak Jesús itech yejón lugar.

11

Lázaro oixpolivik

¹ Itech altepetl de Betania okatka se tlakatl tlen omokokovaya itoka Lázaro, ochantia ivan iveltivah María ivan Marta.

² Nin María ikni in Lázaro, yen okiteekili ajviakayotl itech ikxivah in toTeko iva okinvajvachili ika itzonkal.

³ Tonses, yejonmeh iknivah in Lázaro otlatitlankeh ma kilvitih in Jesús:

—ToTeko, moyolikni Lázaro chikavak mokokova.

⁴ Ijkuak Jesús okikakki, okijto:

—Yejón kokolistli mach kixpolos, sino ika moteititis imavistilis in Dios, iva ika yejón kokolistli noijki ika moteititis imavistilis iKone in Dios.

⁵ Jesús sa tlawel okintlasojtlaya in Marta, María ivan Lázaro,

⁶ iva maski okilvijkeh nik Lázaro chikavak mokokova, Ye ok omoka ome tonali kan okatka.

⁷ Satepa Jesús okinmilvi in momachtijkeh:

—Ma tiviah oksemi para Judea.

⁸ Ijkuakó in momachtijkeh okilvijkeh:

—Tlamachtí, ayamo wejkava in tlayakankeh judiojtih okinekia mitzixpoloskeh ika tetl, ¿iva oksemi tikneki tias ompa?

⁹ Jesús okinmilvi:

—Se tonali kipia majtlaktli ivan ome ora. Tla se tlakatl nemis ijkuak tlanestok, mach motepotlamis porke tlanestok.

¹⁰ Pero tla se nemis kan tlayova, velis se motepotlamis porke amo kipia in tlavili.

¹¹ Satepa Jesús okinmilvi:

—Toyolikni Lázaro ye kochi, pero Ne nikijxitis.

¹² Ijkuakó in momachtijkeh okilvijkeh:

—ToTeko, tla san kochi, kijtosneki pajtis.

¹³ Pero tlen Jesús okinmilvi kijtosneki in Lázaro yoixpolivik, pero yejvah okiyejyekojkeh ke Jesús okinmilvijtoka nik in Lázaro kochi.

¹⁴ Ijkuakó Jesús okinyekilvi:

—Lázaro yoixpolivik.

¹⁵ Iva nipaki porke amo ompa onikatka, yejón se kuali para imejvah para okachi xitlanel-tokakah nonavak. Tiavih, ma tikittatih.

¹⁶ Ijkuakó Tomás tlen okilviayah Nenetl, okinmilvi tlen oksekimeh momachtijkeh:

—Ma tiviah tejvah noijki, para tiixpoliviskeh ivan Jesús.

Jesús teyolitia iva kitemaka nemilistli

¹⁷ Ijkuak Jesús oajsito Betania, okimatki nik in Lázaro yokivikaya navi tonali tooktok.

¹⁸ Betania okatka serka de Jerusalén, san kana eyi kilómetro,

¹⁹ iva miekeh judiojtih oyajkeh otetlajpalotoh ichan Marta ivan María, para kinyolaliskeh por oixpolivik in Lázaro.

²⁰ Ijkuak Marta okimatki nik Jesús yompa ovalaya, okinamikito, pero María omoka kaliijtík.

²¹ Iva Marta okilvi in Jesús:

—NoTeko, tla nika otieskia, nokni amo oixpoliviskia.

²² Pero ne kuali nikmati ke nochi tlen tejwatzi tiktlajtlanilis in Dios, Ye mitzmasukas.

²³ Jesús okilvi:

—Mokni moyolitis.

²⁴ Marta okilvi:

—Ne nikmati nik moyolitis ijkuak nochtin mikameh moyolitiskeh itech neká tonali tlen yetos sa ik tlami.

²⁵ Ijkuakó Jesús okilvi:

—Yen Ne tlen niktemaka nemilistli iva yen Ne tlen niteyolitia. Tlen nechnehtokas maski ma ixpolivi, satepa moyolitis.

²⁶ Iva nochtin tlen ok yolitokeh iva nechnel-tokah, amo kema ixpoliviskeh. ¿Tikneltoka tlen nimitzilvia?

²⁷ Marta okilvi:

—Ajá, noTeko, ne nikneltoka ke tejwatzi tiCristo iKone in Dios, tlen tejvah otikchiayah ma viki itech nin tlaltikpaktli.

Jesús ochokak

²⁸ Ijkuak otlanki ijkó okijto, Marta oyá okinotzato ikni María iva okilvi san ichtakatzi:

—In Tlamachtli nika kajki, mitznotza.

²⁹ Ijkuak María okikakki tlen Marta okilvi, omoketevak oyá okittato in Jesús.

³⁰ Jesús ayamo okalakia kan altepetl, ok okatka kan Marta okinamikki.

³¹ In judiojtih tlen okatkah kalijtik tlen okiy-olalijtokah in María, ijkuak okittakeh in María omoketevak iva okistevak, yejvah noijki okik-istevakeh iva okitokakeh. Yejvah okiyejyekojkeh yavi chokati kan toktok in Lázaro.

³² Ijkuak María oajsito kan okatka in Jesús, omotlankuaketzki ikxitla iva okilvi:

—NoTeko, tla nika otieskia, nokni amo oixpoliviskia.

³³ Jesús okittak in María sa tlawel choka, iva in judiojtih tlen okivaltokayah noijki chokah. Ijkuakó Jesús oyoltilinki iva sa tlawel omoy-olkoko.

³⁴ Iva okintlajtlani:

—¿Kan onkitookakeh?

Yejvah okilvijkeh:

—ToTeko, xiviki xikittaki.

³⁵ Iva Jesús ochokak.

³⁶ Sekimeh judiojtih okijtojkeh:

—Xikittakah, yi neli okitlasojtlaya.

³⁷ Iva sekimeh de yejvah okijtojkeh:

—Tla ovelik okitlachialti in tlakatl tlen amo otlachiaya, ¿amitla ovelik okichi para amo ma ixpolivi in Lázaro?

Jesús okiyoliti in Lázaro

³⁸ Jesús ok ijkó moyolkokojtok, omotoki kan okitookakeh in Lázaro. Okatka ijtik se kuevajtzi iva otentzaktoka ika se tetl patlaktik.

³⁹ Jesús okinmilvi:

—Xikachivakah in tetl.

Marta, ikni in Lázaro, okilvi in Jesús:

—NoTeko, yi tzojyaxtos porke yi kipia navi tonali de oixpolivik.

⁴⁰ Pero Jesús okilvi:

—Yonimitzilvi, tla techneltokas velis tikittas imavistilis in Dios.

⁴¹ Ijkuakó okachijkeh in tetl. Jesús oajkotlachixki ik ilvikak iva okijto:

—NoTajtzi, nimitztlasojkamati porke techkaki.

⁴² Ne nikmati nik nochipa techkaki, iva ijki nikijtova para ke in gentejtih tlen nika kateh ma kineltokakah nik tejwatzi otechvaltitalanki.

⁴³ Ijkuak otlanki ijkó okijto, chikavak okitzajtzili:

—¡Lázaro, xivalkisa de ompa!

⁴⁴ Ijkuakó Lázaro tlen oixpolika ovalkiski kemilitivitz ika tzotzoli itech ikxivah iva itech imavah, iva oixkemilitivalaya ika se tzotzoli. Iva Jesús okinmilvi:

—Xiktotomakah iva xikavakah ma via.

*Omotlatlalvijkeh kenik kixpoloskeh in Jesús
(Mt. 26:1-5; Mr. 14:1-2; Lc. 22:1-2)*

⁴⁵ Ijkuakó otlaneltokakeh inavak Jesús miekeh judiojtih tlen otetlajpalotoh inavak María porke okittakeh tlen Jesús okichi.

⁴⁶ Pero sekimeh oyajkeh okinmitatoh in fariseos iva okinmilvijkeh tlen Jesús okichi.

⁴⁷ Ijkuakó in tlayakankeh tiopixkeh, ivan fariseos ivan tlen povih itech injunta in judiojtih, omololojkeh para omotlapovijkeh. Okijtojkeh:

—¿Tlán tikchivaskeh? Nin tlakatl kinchiva miekeh tetzavkaneskayomeh.

⁴⁸ Tla tikaviliskeh ijko ma kichijtinemi, nochtin pevas kineltokaskeh, iva in tekivajkeh de Roma vitzeh iva kixixiniskeh in templo iva nochi topaís.

⁴⁹ Pero se de yejvah itoka Caifás, tlen okatka wei tiopixki itech yejón xivitl, okinmilvi:

—Imejvah amitla inkimatih.

⁵⁰ Amo inkimomakah kuenta ke para tejavah okachi kuali ma ixpolivi san se tlakatl por nochtin toknivah, iva amo nochi in topaís ma ixpolivi.

⁵¹ Pero tlen okijto in Caifás mach san por ye ijko okiyejyeko okijto, sino komo okatka wei tiopixki itech yejón xivitl, Dios okichi ma kijto in Caifás ke Jesús ixpolivis por nochtin gentejtih de Israel.

⁵² Iva amo ixpolivis san por yen gentejtih de Israel, sino noijki ixpolivis para kinmololos nochtin ipilvah in Dios tlen xixintokeh sentetl itech nochi nin tlaltikpaktli.

⁵³ Por eso desde yejón tonali ope kitemovah kenik velis kixpoloskeh in Jesús.

⁵⁴ Por eso, Jesús ayakmo omoteititiaya inmixpa in judiojtih. Okiski de itech yejón tlali de Judea iva oyá kan se altepetl itoka Efraín, tlen kajki serka kan tlavaki, iva ompa omoka invan momachtijkeh.

⁵⁵ Opolitoka sa kana keski tonali para ajsiki inmiviv in judiojtih tlen itoka Pascua. Miekeh gentejtih de miekeh altepemeh yovalajtokah Jerusalén para mochipavaskeh antes de pevas ilvitl de Pascua.

⁵⁶ Ijkuakó okitemovayah in Jesús, iva ijkuak yokatkah nochtin kan templo, omotlajtlaniayah:

—¿Imejvah, tlán inkiyejyekovah? ¿Vitz ilvitl in Jesús o noso amo?

⁵⁷ In fariseos ivan tlayakankeh tiopixkeh otlanavatijkeh tla íkka kimatis kanin kajki in Jesús, ma kinmatilti para kikitzkiskeh.

12

Se sivatl okiteekili ajviakayotl in Jesús itech ikxivah

(Mt. 26:6-13; Mr. 14:3-9)

¹ Chikuase tonali antes de ajsiki ilvitl de Pascua, Jesús oyá Betania kan ochantia in Lázaro, tlen Jesús okiyoliti.

² Ompa okitemakakeh se tlaxkali para motlajsojkamatiskeh inavak Jesús. Marta okintlateekiliaya iva Lázaro noijki ompa okatka inakastla in Jesús otlakuajtokah kan mesa.

³ Ijkuakó María okivalikak kemi tlajko litro de ajviakayotl de nardo tlen patío, iva okiteekili

itech ikxivah in Jesús, satepa okinvajvachili ika itzonkal. Iva nochi otlaajviayak in kalijtik ika yejón ajviakayotl.

⁴ Ijkuakó Judas Iscariote ipiltzi in Simón, tlen okatka se de tlen momachtijkeh iva tlen satepa okitemakti in Jesús, okijto:

⁵ —¿Tleka amo omonemakak nin ajviakayotl ika eyi siento denario kemi tlen se kitlani de se xivitl tlen tlapalevia, iva se okinmakaskia in tomi tlen prowestih?

⁶ Pero Judas ijko okijto amo porke yi neli okinmiknomatia in prowestih, sino porke okatka ichtekki. Judas yen okittaya in tominbolsa iva ichtaka okimotlaatiliaya seki tomi.

⁷ Ijkuakó Jesús okilvi:

—Xikava, porke ye yokitlaatijtoka nin ajviakayotl para kixavilis nokuerpo para ijkuak nechtookaskeh.

⁸ In prowestih nochipa yeskeh, pero Ne amo nochipa inmovah nietos.

Lázaro okinekiah kimiktiskeh

⁹ Miekeh judiojtih okimatkeh nik Jesús okatka kan altepetl de Betania, iva oyajkeh okittatoh. Amo oyajkeh san para kittaskeh in Jesús, sino noijki para kittaskeh in Lázaro, tlen Jesús okiyoliti.

¹⁰ Ijkuakó in tlayakankeh tiopixkeh omotlallalvijkeh noijki para kimiktiskeh in Lázaro.

¹¹ Porke ijkuak Lázaro omoyoliti, miekeh judiojtih ope moxelovah de yejvah iva ope tlaneltokah inavak Jesús.

*Jesús okalakki Jerusalén kemi wei tlanavati
(Mt. 21:1-11; Mr. 11:1-11; Lc. 19:28-40)*

¹² Miekeh gentejtih oyajkeh Jerusalén itech ilvitl de Pascua. Omostlatik, ijkuak okimatkeh ke Jesús vitz ompa Jerusalén, ¹³ ijkuakó okitekito seki soyatl iva oyajkeh okinamikito in Jesús. Iva okijtovayah chikavak:

—¡Viva! ¡Ma Dios kitiochiva tlen vitz ika itoka toTajtzin Dios! ¡Ma Dios kitiochiva in wei tlanavati de Israel!

¹⁴ Jesús okajsik se burrojtzin iva ipan omotlali. Kemi kijtova in Tiotlajkuiloli:

¹⁵ Gente de Sión amo ximomavtikah.

Xikittakah in moweitlanavati yompa valmuika, yetivitz ipan se burrojtzin.

¹⁶ Itech yejón tonali in momachtijkeh amo okajsikamatkeh tlán kijtosneki tlen otlamochivalok, pero satapa ijkuak Jesús oixpolivik iva omoyoliti ika wei imavistilis, okilnamikeh ke nochi yejón tlamantli yokatka ijkuilitok itech Tiotlajkuiloli, iva ijkó otlamochivalok.

¹⁷ Okatkah miekeh gentejtih ijkuak Jesús okilvi in Lázaro ma kisa de kan otoktoka iva okiyoliti. Iva yejvah ope tetlapoviah de tlen okittakeh otlamochi.

¹⁸ Por eso, miekeh gentejtih oyajkeh okinamikito in Jesús, porke okimatkeh nik okichi se wei tetzavkaneskayotl.

¹⁹ Pero in fariseos okimolviayah entre yejvah:

—Xikittakah, nochtin gentejtih yaviah inavak Jesús. Iva tejevah amo veli itla tikchivah.

Sekimeh tlen de Grecia okitemojkeh in Jesús

²⁰ Itech yejón ilvitl de Pascua noiĵki ompa okatkah sekimeh gentejtih de Grecia tlen noiĵki oyajkeh okimavistilitoh in Dios.

²¹ Ninmeh gentejtih de Grecia omotokijkeh inavak Felipe tlen okatka de altepetl de Betsaida de tlali de Galilea, iva okitlatlavtijkeh okilvijkeh: —Tejwatzi, tiknekih tikittaskeh in Jesús.

²² Felipe oyá okilvito in Andrés, iva satepa nochtin ome oyajkeh okilvitoh in Jesús.

²³ Jesús okinnankili: —Yoajsik ora para kimavistiliskeh iKone in Tlakatl.

²⁴ Yi neli nimechilvia, tla se semiya amo kitookaskeh, amo mikis iva nochipa yetos iĵkó san se semiya. Pero tla kitookaskeh, mikis iva tlakis miek.

²⁵ Tlen kitekipachos okachi inemilis iva amo kichivas tlen nikijtova, amo velis kiplas nemilistli para semijkak. Pero tlen kiyejyekos ke amo mon-eki motekipachos por inemilis iva kichivas tlen nikijtova, tonses kiplas nemilistli para semijkak.

²⁶ Tlen kinekis nechtekipanos, moneki ma nechseguiro. Iva kan Ne nietos, ompa yetos noiĵki tlen nechtekipanova. Tla íkka nechtekipanos, noTajtzi kitlakitas.

Jesús okitematilti kenik ixpolivis

²⁷ 'Axka sa tlawel nimoyolkokova, iva amo nikmati tlán nikijtos. Iva amo velis nikilvis noTajtzi ma nechpalevi de itech nin tlajyovilistli. Porke para yejón nik onivala.

²⁸ NoTajtzi, xikinmititi in gentejtih momavistilis.

Iĵkuakó omokakki se tlajtoli de ilvikak okijto:

—Yonikinmititi nomavistilis iva oksemi nikinmititis.

²⁹ In gentejtih tlen ompa okatkah okijtojkeh okikakkeh olatikuinki, iva oksekimeh okijto-vayah:

—Se ilvikaktlatitlanili okitlapovi.

³⁰ Ijkuakó Jesús okinmilvi:

—Yejón tlen onkikakkeh amo omokakki para Ne ma nikkaki, sino para imejvah xikkakikah.

³¹ Yoajsik in tonali para Dios kijtos akinmeh tlajtlakolejkeh iva akinmeh amo itech nin tlaltikpaktli, iva nikixtilis itekiv in Amo Quali Tlakatl tlen tlanavatia itech nin tlaltikpaktli.

³² Iva ijkuak nechajkuanaskeh tlakpak itech krus, nikchivas ke nochtin gentejtih ma tlaneltokakah nonavak.

³³ Ika nin tlajtoli Jesús okinmajsikamatilti kenik ixpolivis.

³⁴ In gentejtih okinankilijkeh:

—In Tiotlajkuiloli kijtova nik in Cristo yolitos para semijkak. ¿Kenik in te tikijtova ke iKone in Tlakatl kajkuanaskeh tlakpak? ¿Akin yejón iKone in Tlakatl?

³⁵ Jesús okinmilvi:

—In tlavili ok yetos imovah sa kana keski tonali. Tos xinemikah itech tlavili mientras invelih, para amo inmopah vitz in tlayovalotl. Porke tlen nemih kan tlayova, amo kimatih kan yavih.

³⁶ Xitlaneltokakah inavak in tlavili mientras ok kajki inmovah, para xiekah intepilvah de yen tlavili.

Ijkuak Jesús otlanki okijto nin tlajtoli, oyá de ompa iva okinmonetlatili.

In judiojtih amo okineltokilijkeh in Jesús

³⁷ Maski Jesús okinchi miekeh tetzavkaneskay-
omeh inmixpa in judiojtih, yejvah amo okinel-
tokiliayah.

³⁸ Ijkó otlamochivalok para ma mochiva tlen
okijto in tiotenejmachtli Isaías:

NoTeko, ¿akin kineltoka motlajtol tlen tejvah
tiktemañiltiah?

¿Akin yotikititi movelitilis?

³⁹ Yejvah amo oveliah okineltokayah, iva Isaías
noijki okijto:

⁴⁰ Dios okintokti amo ma tlachiakah iva ma
yotlakuavakah,

okintokti amo ma tlachiakah,

iva nion amitla ma kajsikamatikah,

para amo ma mokuapakah nonavak, iva amo ma
nikinpajti.

⁴¹ Isaías ijkó okijto porke okittak imavistilis in
Jesús, iva otlajto de Ye.

⁴² Iva miekeh judiojtih otlaneltokakeh inavak
Jesús, asta in tlayakankeh judiojtih noijki ot-
laneltokakeh, pero amika otlajtovaya de yejón
tlamantli porke okinmiimakasiah in fariseos,
porke amo okinekiah ma kinkixtikah para semi-
jgak de kan tiotlamachtijkali.

⁴³ Yejvah okinekiah kualikavaskah innavak
in gentejtih maski amo ma mokavakah kualikavak
inavak Dios.

Jesús okinmakixtikoh in gentejtih

⁴⁴ Ijkuakó Jesús chikavak okijto:

—Tlen nechnehtokilia, amo san Ne nechnehtok-
ilia, sino noijki kineltokilia noTajtzi tlen onech-
valtitlanki.

⁴⁵ Iva tlen nechitta, noijski kitta noTajtzi tlen onechvaltitalanki.

⁴⁶ Ne onivala itech nin tlaltikpaktli kemi se tlavili. Iva nikintlavilia nochtin tlen nechnel-tokah, iva amo kema yeskeh kan tlayova.

⁴⁷ Pero tla ikka kikaki notlajtol iva amo kichiva tlen nikijtova, amo Ne niktajtlakoltis. Porke Ne amo onivala onikintajtlakoltiko in tlaltikpakt-lakah, sino Ne onivala onikinmakixtiko de itech tlajtlakoli.

⁴⁸ Tlen amo nechneki iva amo kineki kikakis notlajtol, onka akin kitlajtlakoltis, kijtosneki yen notlajtol tlen Ne nikijtova, ye kitlajtlakoltis itech neká tonali tlen yetos sa ik tlami.

⁴⁹ Porke Ne amo nikijtova san tlen Ne nikneki. NoTajtzi tlen onechvaltitalanki, Ye onechnavati tlen moneki nikijtos iva tlen moneki nitla-machtis.

⁵⁰ Iva Ne nikmati ke tlen kichivah tlen kijtova itlajtol de noTajtzi, kinmaka nemilistli para semi-jkak. Tonses, tlen Ne nikijtova, nikijtova ijkó kemi noTajtzi onechilvi ma nikijto.

13

Jesús okinmixonipajpaki in momachtijkeh

¹ Antes de ilvitl de Pascua, Jesús yokimatia nik yoajsik ora para yaski de itech nin tlaltikpaktli iva yas inavak iTajtzi. Ye nochipa okintlasojtlak tlen iaxkavah itech nin tlaltikpaktli, sa tlawel okintlasojtlak asta omotemakti ma kixpolokah por yejvah.

² Yejón yovak, ijkuak Jesús ivan momachtijkeh otlakuajtakah, in Amo Kualí Tlakatl ipa yokitlali-
jka itech iyolo in Judas Iscariote, ipiltzi in Simón,
para ma kitemakti in Jesús.

³ Iva Jesús yokimatia ke iTajtzi yokimaktili
nochi velitilistli itech nochi tlamantli, iva okima-
tia nik Ye ovala de Dios iva oksemi mokuapas
inavak.

⁴ Ijkuakó Jesús omoketzki de kan mesa, okixti
itlaken tlen okimokentiaya, iva omotlajkoilpi ika
se toaya.

⁵ Ijkuakó okitlali atl ika se ajpatzintli iva ope
kinmixipajpaka in momachtijkeh iva satepa ok-
invajvachili ika toaya tlen ika omotlajkoilpijka.

⁶ Ijkuak Jesús yokixipajpakaskia in Simón
Pedro, okilvi:

—NoTeko, ¿tejwatzi techixipajpakas?

⁷ Jesús okinankili:

—Tlen nikchijtok, te axka amo tikajsikamati,
pero satepa tikajsikamatis.

⁸ Pero Pedro okilvi:

—Tejwatzi amo kema techixipajpakas.

Jesús okinankili:

—Tla amo nimitzixipajpakas, amitla tikpías
nova.

⁹ Ijkuakó Simón Pedro okilvi:

—NoTeko, tla ijko, amo san nokxivah xikinpa-
jpaka, sino noijki nomavah iva notzonteko.

¹⁰ Pero Jesús okilvi:

—Se tlen yikin omalti, moneki san ikxivah ma
kinpajpaka, porke ya chipavak. Iva imejvah
yinchipavakeh, maski amo innochtin.

¹¹ Jesús okimatia akin kitemaktis, por eso
okijto: “Amo innochtin inchipavakeh.”

¹² Ijkuak otlanki okimixipajpaki in momachti-jkeh, oksemi okimokenti itlaken iva omotlalito kan mesa, iva okinmilvi:

—¿Inkajsikamatih tlán kijtosneki tlen onikchi inmovah?

¹³ Imejvah innechnotzah nimoTlamachti iva nimoTeko, iva kuali tlen inkijtovah, porke yi neli Ne nimoTlamachti iva Ne nimoTeko.

¹⁴ Iva tla Ne nimoTeko iva nimoTlamachti onimechixipajpaki, torses imejvah noijki moneki ijko xikchivakah entre imejvah.

¹⁵ Ne nimechmaka se ejemplo para imejvah noijki ijko xikchivakah kemin Ne yonikchi inmovah.

¹⁶ Yi neli nimechilvia, se tlen san tlapalevia mach velis okachi weititos ke iteko, iva se tlen san kititlanih mach velis okachi weititos ke tlen tlatitlani.

¹⁷ Tla inkajsikamatih iva inkichivah tlen nimechilvijtok, torses xipakikah.

¹⁸ 'Tlen nikijtova amo nikijtova para innochtin. Ne nikmati akinmeh onikinpejpenki. Pero kipia tlen mochivas kemi kijtova in Tiotlajkuiloli: "In tlakatl tlen nova otlakua, omochi nokontra."

¹⁹ Desde axka nimechilvia maski ayamo ijko tlamochiva, para ijkuak ijko tlamochivas, xiknel-tokakah nik Yen Ne niCristo.

²⁰ Yi neli nimechilvia, tla ikka kiselis tlen Ne niktitlani, kijtosneki Ne nechselia, iva tlen Ne nechselia, noijki kiselia tlen onechvaltitlanki.

Jesús okinmilvi nik in Judas kitemaktis

(Mt. 26:20-25; Mr. 14:17-21; Lc. 22:21-23)

²¹ Ijkuak Jesús okijto nin tlajtoli, sa panova omotekipacho iva okinyekimilvi:

—Yi neli nimechilvia, se de imejvah nechtemaktis.

²² Ijkuakó in momachtijkeh ope motlatlajtlatah, porke amo okimatiah akin ijko kichivas.

²³ Se de yevvah tlen Jesús sa tlawel okitlajsojtlaya, omonakasiktekak itech Jesús mientras otlakuayah.

²⁴ In Simón Pedro okichivili señas para ma kitlajtlani in Jesús de akin tlapojtok.

²⁵ Ijkuakó okachi omotoki asta kan ielpa Jesús iva okitlajtlani:

—NoTeko, ¿akin mitztemaktis?

²⁶ Jesús okinankili:

—Nikapachos seki pan, iva akin Ne nikmakas, yen yejón.

Ijkuakó Jesús okapacho se pedaso pan iva okimakak in Judas Iscariote, ipiltzi in Simón.

²⁷ Iva ijkuak Judas okikua in pan, in Amo Quali Tlakatl okalakki itech iyolo. Iva Ijkuakó Jesús okilvi:

—Xikchijvetzi san nima tlen tikchivas.

²⁸ Pero nion se de yevvah tlen otlakuajtokah kan mesa amo okajsikamatkeh tleka ijko okilvi.

²⁹ Komo Judas yen okittaya in tominbolsa, sekimeh okiyejyekojkeh xamo in Jesús okilvi ma via ma kikovati tlen monekis para ilvitl de Pascua, o noso itla ma kinmaka tlen prowestih.

³⁰ Ijkuak Judas otlanki okikua in pan tlen Jesús okimakak, san nima okiski. Iva ijkuakó yokatka yi yovak.

Se yankuik tlanavatili

³¹ Satepa ijkuak Judas yokiski, Jesús okijto:

—Axka moteititis imavistilis iKone in Tlakatl, iva noijki moteititis imavistilis in Dios itech Ye.

³² Iva tla ikone in Tlakatl kiteititis imavistilis in Dios, in Dios noijki kiteititis imavistilis iKone in Tlakatl. Iva san nima kichivas.

³³ Nopilvah, mach ok wejkavas nietos inmovah. Imejvah innechtemoskeh. Pero ijkó kemi onikinmilvi tlen tlayankeh judiojtih, axka imejvah noijki nimechilvia: Kan Ne niav, imejvah amo velis inyaskeh.

³⁴ Ne nimechmaka se yankuik tlanavatili: Ximotlasojtlakah entre imejvah. Ijkó kemin Ne nimechtlasojtla, imejvah noijki ijkó ximotlasojtlakah.

³⁵ Tla imejvah yi neli inmotlasojtlaskeh, tonses nochtin kimomakaskeh kuenta ke imejvah yi neli inmomachtijkeh de Ne.

Jesús okilvi in Pedro se tonali kijtos nik amo kixmati

(Mt. 26:31-35; Mr. 14:27-31; Lc. 22:31-34)

³⁶ Simón Pedro okitlajtlani in Jesús:

—NoTeko, ¿kan timuikas?

Jesús okinankili:

—Kan Ne nias, axka mach velis tias nova. Pero satepa velis tias.

³⁷ Pedro okilvi:

—NoTeko, ¿tleka axka amo velis nias mova? Tla moneki, asta velis nimotemaktis ma nechmiktikah por tejwatzi.

³⁸ Jesús okinankili:

—¿Timotemaktis ma mitzmiktikah por Ne? Yi neli nimitzilvia, antes de tzajtzis in kaxtil, para ijkuakó te yotikijto eyi welta nik amo techixmati.

14

Jesús yen ojtli para se yas kan toTajtzin Dios

¹ 'Amo ximoyolkokokah. Xikneltokakah Dios iva Ne noijki techneltokakah.

² Kan ikalijtik noTajtzi onka miek lugar kan se chantis. Tla amo ijko oyeskia, amo onimechilviskia. Ne niav ompa nitlayektlaliti para imejvah noijki ompa xikpiakah se lugar.

³ Iva satepa ijkuak yonia iva yi tlayektlalitos, oksemi nivalmokuapas iva nimechvikas, para imejvah noijki xietokah kan Ne nietos.

⁴ Imejvah yinkixmatih in ojtli iva yinkimatih kan niav.

⁵ Ijkuakó Tomás okilvi:

—NoTeko, tejvah mach tikmatih kan tiav, ¿kenomi tikmatischeh katli yen ojtli?

⁶ Jesús okinankili:

—Ne niojtli tlen tevika ilvikak, Ne nitlamachtia tlen melajkayotl, iva Ne niktemaka nemilistli para semijkak. San Ne velis nimechvikas inavak noTajtzi, iva tla amo por Ne amo velis inmajsitivih inavak.

⁷ Tla imejvah yonnechixmatkeh, tonses imejvah noijki inkixmatischeh noTajtzi. Iva desde axka yinkixmatih, porke yinkonitokeh.

⁸ Ijkuakó Felipe okilvi:

—ToTeko, techkavili ma tikittakah moTajtzi. San yen yejón tlen tejvah tiknekih.

⁹ Jesús okilvi:

—Yowejka nika inmovah, ¿iva ayamo techixmati Felipe? Tlen yonechitak, kijtosneki yokittak

noTajtzi. Tonses, ¿kenik in te tikijtova ma nimechititi in noTajtzi?

¹⁰ ¿Amo tikneltoka ke Ne ivan noTajtzi timochijtokeh san se? Nochi tlen Ne nimechilvia, mach nikijtova san tlen Ne nikmoyejyekolia. NoTajtzi yen kichiva nochi in tekittl por medio de Ne.

¹¹ Techneltokilikah ijkuak nimechilvia ke Ne nika ivan noTajtzi, iva noTajtzi kajki nova. Iva tlamó, sikiera techneltokilikah por nochi tlen yonikchi.

¹² Yi neli nimechilvia, tlen nechneltoka, noijki velis kinchivas in tlamantih tlen Ne nikinchiva. Iva velis kinchivas okachi wejwei tlamantih, porke Ne niav inavak noTajtzi.

¹³ Nochi tlen inkitlajtlaniskeh noTajtzi ika notoka, Ne nimechmakas. Para ijko imavistilis noTajtzi ma motta itech ikone.

¹⁴ Tla itla inkitlajtlaniskeh ika notoka, Ne nimechmakas.

Jesús okijto kivaltitlanis iTioijyotzi

¹⁵ 'Tla imejvah innechtlasojtlah, tonses xikchivakah tlen kijtovah notlanavatilvah.

¹⁶ Iva Ne niktlatlavtis noTajtzi ma imechtitlanili in Teyolchika para nochipa ma yeto inmovah.

¹⁷ In Teyolchika yen Tioijyotzintli tlen kiteititia tlen yi neli melajka. In taltikpaktlakah tlen amo noaxkavah amo velis kipiaskeshe yejón Tioijyotzintli, porke amo kittah iva nion amo kixmatih. Pero imejvah inkixmatih porke kajki inmovah iva nochipa yetos inmovah.

¹⁸ Amo nimechkavas kemi inmiknomeh. Ne oksemi nivalmokuapas iva inmovah nietos.

¹⁹ Mach ok wejkavas in tlaltikpaktlakah ayakmo nechitaskeh, pero imejvah innechitaskeh. Ne niyolitok nochipa, iva por eso imejvah noiiki inyolitoskeh nochipa.

²⁰ Itech neká tonali imejvah inkajsikamatiskeh ke Ne nika ivan noTajtzi, iva imejvah inkateh nova, iva Ne nika inmovah.

²¹ Tlen kinselia notlanavatilvah iva kinvelkaki, kiteititia nik yi neli nechtlasojtla. Iva tlen nechtlasojtla, noTajtzi kitlasojtlas, iva Ne noiiki niktlasojtlas iva nimoteititis inavak.

²² Ijkuakó Judas, amo Judas Iscariote sino tlen oksé Judas, okitlajtlani:

—NoTeko, ¿tleka timoteixmatiltis tonavak iva amo innavak in tlaltikpaktlakah?

²³ Jesús okinankili:

—Tlen nechtlasojtla kijtosneki kichiva tlen nikijtova. NoTajtzi kitlasojtlas, iva noTajtzi ivan Ne tivitzeh tichantikivih inavak.

²⁴ Akin amo nechtlasojtla, kijtosneki amo kichiva kuenta tlen nikijtova. In tlajtoli tlen imejvah inkikakih mach Ne notlajtol sino itlajtol noTajtzi tlen onechvaltitaniki.

²⁵ 'Ne nimechilvia nochi nin tlajtoli mientras ok nika inmovah.

²⁶ Pero in Teyolchika, in Tioijyotzintli tlen noTajtzi kivaltitlanis ika notoka, Ye imechmachtis de nochi, iva imechilnamiktis nochi tlen Ne yonimechilvi.

²⁷ 'Nimechkajteva xietokah ika yolvevilistli. In yolvevilistli tlen Ne nimechmaka amo kemi in yolvevilistli tlen kitemakah in tlaltikpaktlakah.

Amo ximotekipachokah iva nion amo ximomavtikah.

²⁸ Imejvah yonkikakeh tlen onikijto, onimechilvi nias iva oksemi nivalmokuapas para nietos inmovah. Tla yi neli onnechtlasojtlaskiah, onpakiskiah ijkuak onimechilvi niav inavak noTajtzi, porke noTajtzi okachi wei ke Ne.

²⁹ Ne yonimechilvi nochi nin tlamantli antes de ijko tlamochivalos, iva ijkuak ijko tlamochivalos, imejvah xitlaneltokakah nonavak.

³⁰ 'Ayakmo wejkavas nimechtlapovis, porke ompa vitz in Amo Kuali Tlaktl tlen kinnavatia in tlaltikpaktlakah. Pero ye amitla velis nechtoktis.

³¹ Pero Ne nikchivas tlen nechnavatia noTajtzi, para ijko ma kimatikah in tlaltikpaktlakah nik yi neli niktlasojtla noTajtzi. Ximoketzakah, ma tiviah de nika.

15

In uvaskuaviti van imamayovah

¹ 'Ne nika kemi se tlen yi neli uvaskuaviti iva noTajtzi kajki kemi se tekpano tlen kikuidarova in uvaskuaviti.

² Tla se nomamayo amo tlaki, noTajtzi kitzonteki. Pero tla kualitlaki kichijchipava para okachi ma tlaki.

³ Iva imejvah yonmochipajkeh, ika notlajtlotlen Ne yonimechilvi.

⁴ Xisetitokah nova, kemin Ne nisetitok inmovah. Se imamayo in uvaskuaviti amo velis tlakis iselti. Moneki setitos itech itlaktzonyo. Ijko noijki, tla imejvah amo insetitoskeh nova,

amo velis inhlakiskeh, kijtosneki amitla velis inkichivaskeh tlen kuali.

⁵ 'Ne nika kemi se uvaskuavitl iva imejvah inkateh kemi nomamayovah. Tlen setitos nova iva Ne nisetitos iva, tlakis miek. Porke tla amo insetitoskeh nova, amitla velis inkichivaskeh.

⁶ Tlen amo setitos nova, kitzontekiskeh iva kitlamotlaskeh sekka kemi se imamayo in uvaskuavitl tlen amo kuali, iva vakis. Satepa kololoskeh iva kitlamotlaskeh ijtik tlitl para ma tlatla.

⁷ 'Tla imejvah insetitoskeh nova iva inkichivaskeh tlen nimechilvia, xiktlatlanikah nochi tlen inkinekiskeh iva Dios imechmakas.

⁸ NoTajtzi kiplas miek pakilistli tla imejvah inkiplaskeh miek tlakilotl, iva ijkó mottas nik yi neli imejvah inmomachtijkeh de Ne.

⁹ Ne nimechtlasojtla imejvah ijkó kemi noTajtzi nechtlasojtla. Xietokah ika notlasojtlalis tlen Ne ika nimechtlasojtla.

¹⁰ Tla inkichivaskeh tlen nimechnavatia, kijtosneki inyeskeh ika notlasojtlalis, ijkó kemin Ne noijki nikchiva tlen nechnavatia noTajtzi iva nika ika itlasojtlalis.

¹¹ 'Ne nimechilvia nochi nin tlajtoli para xipakikah kemin Ne nipaki, iva ijkó yi neli xikpiakah pakilistli.

¹² Ye nin tlen nimechnavatia: Ximotlasojtlakah innochtin ijkó kemin Ne nimechtlasojtla.

¹³ Tlen motemakas ma kixpolokah por iyoliknivah kijtosneki sa panova kintlasojtla.

¹⁴ Imejvah yi neli innoyoliknivah, tla inkichivah tlen nimechnavatia.

¹⁵ Ayakmo nimechnotzas innotlakavah, porke se tlen san tetlakav amo kimati tlen kichiva iteko. Ne Nimechnotzas innoyolikhivah, porke yonimechtlapovi nochi tlen noTajtzi onechilvi.

¹⁶ Mach imejvah onnechpejpenkeh, sino Ne onimechpejpenki iva nimechnavatia xiviah kan Ne nimechtitlani iva xitlakikah miek. Iva nikneki nochipa xitlaktokah. Iva ijkó nochi tlen inkitlajtlaniliskeh noTajtzi ika notoka, Ye imechmakas.

¹⁷ Ximotlasojtlakah entre imejvah. Ye nin tlen nimechnavatia.

In tlaltikpaktlakah omechkualankaitaskeh

¹⁸ 'Tla in tlaltikpaktlakah imechkualankaitah, xikmatikah ke Ne achto yonechkualankaitakeh.

¹⁹ Tla imejvah onyeskiah noiiki kemi yevvah tlen amo kixmatih Dios, tonses yevvah omechtlasojtlaskiah ijkó kemi yevvah motlasojtlah. Pero imejvah ayakmo inkichivah kemi yevvah kichivah, porke Ne onimechpejpenki para amo xietokah kemi yevvah, iva por eso yevvah imechkualankaitah.

²⁰ Xikilnamikikah tlen onimechilvi: "Se tlen san tlapalevia amo velis okachi weititos ke iteko." 'Tla Ne onechochololtijkeh, imejvah noiiki imechochololtiskeh. Iva tla okivelkakeh notlajtol, noiiki kivelkakiskeh inmotlajtol.

²¹ Imejvah imechtoktiskeh nochi yejón porke innechneltokah, iva porke yevvah amo kixmatih akin onechvaltblanki.

²² 'Tla Ne amo onivalaskia iva nion amo onikintlapoviskia, tonses amo okipiaskiah tlajtlakoli. Pero axka ayakmitla onka tlen ika velis motenpaleviskeh de intlajtlakol.

²³ Porke tlen nechkualankaita, kijtosneki noijki kikualankaita noTajtzi.

²⁴ Tla Ne amo onikchivaskia inmixpa itla tlamantli tlen amo kema íkka veli kichiva, tonses yejvah amo okipiaskiah tlajtlakoli. Pero maski yokittakeh yonikchi miek tlamantli, yejvah nechkualankaitah iva noijki kikualankaitah noTajtzi.

²⁵ Ijkí tlamochiva para ma mochiva tlen ijkuilitok itech intlanavatil, kan kijtova: “Onechkualankaitakeh maski amitla onikchi tlen amo kualí.”

²⁶ 'Ijkuak vitz in Teyolchika, in Tioijyotzintli tlen tlamachtia tlen melajkayotl, tlen Ne nimechvaltitlanilis de inavak noTajtzi, Ye imechmatiltis de Ne.

²⁷ Iva imejvah noijki inkitematiltiskeh de Ne, porke imejvah onkatakah nova desde ijkuak ope nitlamachtia.

16

¹ 'Ne nimechilvia nochi nin tlajtoli para mostla viptla amo xikavakah de intlaneltokaskeh non-avak.

² Imechkixtiskeh para semijkak de kan tiotlamachtijkaltih. Ajsis tonali tla íkka imechixpolos kijtos ke ika yejón kichiva se kualí tekítl para Dios.

³ Ijkó kichivaskeh porke amo kixmatih noTajtzi iva nion Ne amo nechixmatih.

⁴ Ijkí nimechilvia para ijkuak ijko tlamochivalos xikilnamikikah nik Ne yonimechilvi desde achto.

Tlen kichiva in Tioijyotzintli

'Acho amo onimechilvi tlen axka nimechilvia, porke onikatka inmovah.

⁵ Pero axka Ne niav inavak noTajtzi tlen onechvaltitaniki. Iva nion se de imejvah amo nechtlajtlania kan niav.

⁶ Yej yope inmoyolkokovah por tlen yonimechilvi.

⁷ Pero Ne nimechilvia tlen yi neli melajka, nik okachi kuali para imejvah ma nivia. Porke tla amo nias, in Teyolchika mach vitz para yetos inmovah. Pero tla nias, Ne nikvaltitanis.

⁸ Ijkuak Ye vitz, kinmajsikamatiltis in tlaltikpaktlakah nik kateh itech tlajtlakoli. Kinmajsikamatiltis akinmeh kateh kuali inavak Dios. Iva kinmajsikamatiltis nik in Dios se tonali kijtos akin tlajtlakole iva akin amo.

⁹ Kinmajsikamatiltis nik kateh itech tlajtlakoli porke amo necheltokah.

¹⁰ Kinmajsikamatiltis akinmeh kateh kuali inavak Dios porke Ne niav inavak noTajtzi, iva ayakmo innechitaskeh.

¹¹ Kinmajsikamatiltis nik in Dios se tonali kijtos akin tlajtlakole iva akin amo, porke in Amo Kualitlakatl tlen tlanavatijtok itech nin tlaltikpaktli, yokitlajtlakoltijkeh iva yas miktla.

¹² 'Nikpia okachi tlen moneki nimechilvis, pero axka imejvah amo velis inkajsikamatiskeh.

¹³ Pero ijkuak vitz in Tioijyotzintli tlen kiteititia tlen yi neli melajka, Ye imechyakanas itech nochi tlen yi neli melajka. Porke amo kijtos itla tlen san Ye kiyeyekos, sino nochi tlen kikakis yen yeyón kijtos, iva imechmatiltis nochi tlen satepa tlamochivalos.

14 Ye kiteititis nomavistilis, porke kiselis de Ne nochi tlen Ye imechmatiltis.

15 Nochi tlen kipia noTajtzi, Ne noaxka. Por eso onimechilvi ke in Tioijyotzintli kiselis de Ne nochi tlen Ye imechmatiltis.

Neyolkokoli mokuapas pakilistli

16 'Polivi sa kana keski tonali iva imejvah ayakmo innechitaskeh, pero amo wejkavas, oksemi innechitaskeh porke Ne niav inavak noTajtzi.

17 Ijkuakó, sekimeh momachtijkeh omotlatlajtlaniykeh:

—¿Tlán kijtosneki tlen techilvia? Kijtova sa kana keski tonali ayakmo tikittaskeh iva amo wejkavas oksemi tikittaskeh, iva kijtova yaski inavak iTajtzi.

18 ¿Tlán kijtosneki tlen kijtova ke ayakmo wejkavas? Mach tikajsikamatih tlen kijtova.

19 Jesús okajsikamatki nik yejvah okinekiah kitlajtlaniiskeh tlán kijtosneki tlen okinmilvi. Ijkuakó okinmilvi:

—Ne yonimechilvi polivi sa kana keski tonali iva imejvah ayakmo innechitaskeh, pero amo wejkavas oksemi innechitaskeh. ¿Yen yejón tlen imejvah inmotlajtlaniah?

20 Yi neli nimechilvia, imejvah inchokaskeh iva inmoyolkokoskeh, pero in tlaltikpaktlakah pakiskeh. Pero maski imejvah inmoyolkokoskeh, inmoneyolkokol mokuapas pakilistli.

21 Ijkuak se sivatl yi mokokos ika ikone, kikokova ikuerpo porke yoajsik ora para mokokos. Pero satempa ijkuak yokipixki ikone,

mach ok kilnamiki kox okikoko ikuerpo, sino yi kipia pakilistli porke yoneski oksé konetl itech nin tlaltikpaktli.

²² Ijkó noiiki imejvah, axka inmoyolkokovah, pero Ne oksemi nimechitas iva imejvah in-pakiskeh, iva amika velis imechkixtilis inmopak-
ilis.

²³ 'Ijkuak ajsis yejón tonali, ayakmitla innecht-lajtlaniiskeh. Yi neli nimechilvia, noTajtzi imech-makas nochi tlen inkitlajtlaniliskeh ika notoka.

²⁴ Asta axka imejvah ayamitla inkitlajtlaniliah ika notoka. Xiktlajtlanikah iva inkiseliskeh, para ijkó yi neli xikpiakah pakilistli.

Jesús yotlatlanki itech nin tlaltikpaktli

²⁵ 'Nochi nin yonimechtlapovi ika ejemplos, pero vitz in tonali ijkuak ayakmo nimechtlapovis ika ejemplos, sino nimechtlapovis ika seki tlaj-toli tlen okachi amo ovi para inkajsikamatiskeh aserka de noTajtzi.

²⁶ Itech neká tonali imejvah velis itla inkitlajt-laniliskeh noTajtzi ika notoka. Mach nimechilvia nik moneki Ne niktajtlanilis noTajtzi por imej-vah.

²⁷ ¡Amo!, porke noTajtzi de por sí imechtlasojtla porke imejvah innechtlasojtlah, iva porke inkineltokah nik Ne nivitz de Dios.

²⁸ Ne onikiski inavak noTajtzi iva onivala itech nin tlaltikpaktli, iva axka nikajteva nin tlaltik-paktli iva nimokuapas oksemi inavak noTajtzi.

²⁹ Ijkuakó in momachtijkeh okilvijkeh:

—Axka kema yi techtlapovijtok ika tlajtoli tlen okachi amo ovi para se kajsikamati, iva ayakmo techtlapovia ika ejemplos.

³⁰ Axka yi tikmatih nik tejwatzi nochi tikmati. Tla ikka kineki itla mitztlajtlanis tejwatzi yi tikmati tlen kineki mitztlajtlanis. Por eso tikneltokah nik tivitz de Dios.

³¹ Jesús okinnankili:

—¿Axka kema yinnechneltokah?

³² Ya ajsitivitz ora, iva ayakmo wejka vas, ijkuak imej vah inxixiniskeh iva kada se kitzkis iojviv, iva innechkajtevaskeh noselti. Pero amo nika noselti, porke noTajtz i kajki nova.

³³ Nochi nin nimechilvia, para ijkó imej vah xietokah ika kual i nonavak. Imej vah intla-jyoviskeh itech nin tlaltikpaktli, pero ximoy-olchikavakah porke Ne yoniktlanili in tlaltikpaktli.

17

Jesús omodiostzajtzi por yej vah tlen okin-machtia ya

¹ Ijkuak otlanki okintlapovi in momachtijkeh, Jesús oajkotlachixki iva okijto:

—NoTajtz i, yoajsik ora. Xikmavistili moKone, para Ye noi jki ma mitzmavistili.

² Tejwatzi otiktlali ma tlanavati itech nochtin tlaltikpaktlakah, para ma kinmaka nemilistli para semij kak nochtin tlen yotikinmakak.

³ In nemilistli para semij kak kijtosneki ma mitzixmatikah tejwatzi tlen yi neli tiDios, iva noi jki ma kixmatikah in Jesucristo tlen otikvalti-tlanki.

⁴ 'Ne yonimitzmavistili itech nin tlaltikpaktli, porke yoniktلامي notekiv tlen otechnavati ma nikchiva.

⁵ Axka pues, noTajtzi, techmaka monavak in mavistilisti tlen onikpiaya mova desde ijkuak ayamo okatka nin tlaltikpaktli.

⁶ 'Ninmeh gentejtih tlen otikinpejpenki de nin tlaltikpaktli tlen tejwatzi otechinmakak, Ne yonikinmatilti akin tejwatzi. Yejvah okatkah moaxkavah, pero tejwatzi otechinmakak, axka kineltokeh iva kichivah tlen kijtova motlajtol.

⁷ Axka yi kimatih ke nochi tlen nikpia tejwatzi otechmakak.

⁸ Porke nochi tlen tejwatzi otehilvi, Ne yonikinmilvi, iva yejvah yokineltokeh. Iva yokajsikamatkeh nik yi neli onivala de monavak, iva yokineltokeh nik tejwatzi otechvaltitanli.

⁹ 'Ne nimitztlatlavia por yejvah. Amo nimitztlatlavia por tlen oksekimeh tlaltikpaktlakah, sino por tlen tejwatzi otechinmakak, porke moaxkavah.

¹⁰ Nochi tlen noaxka, noiiki moaxka, iva tlen moaxka, noiiki noaxka. Iva nomavistilis motta itech yejvah.

¹¹ 'Ne ayakmo nietos itech nin tlaltikpaktli porke yi niav monavak, pero yejvah ok mokavah itech nin tlaltikpaktli. NoTajtzi, tejwatzi tichipavak, tejwatzi xikinkuidaro ika movelitis tlen otechinmakak, para ma setitokah san sekka ijko kemi tejvah tisetitokah san sekka.

¹² Ijkuak Ne onikatka invah itech nin tlaltikpaktli, Ne onikinkuidarovaya ika movelitis tlen otechinmakak. Ne onikinkuidaro para amo ma moixpolokah, iva nion se de yejvah amo omoixpolo, sino omoixpolo san yen tlen yokatka

para moixpolos, para ma mochiva tlen kijtova in Tiotlajkuiloli.

¹³ 'Pero axka ya niav monavak. Iva nikijtova nin tlajtoli mientras ok nika itech nin tlaltikpak-tli, para ma velikah ma kipiakah nopakilis, nochi nopakilis tlen nikpia.

¹⁴ Ne yonikinmakak motlajtol tlen momachtijkeh, pero in tlaltikpaktlakah kinkualankaitah, porke yejvah ayakmo povih de nin tlaltikpak-tli, ijkó kemin Ne noiiki amo nipovi de nin tlaltikpak-tli.

¹⁵ Amo nimitztlatlavtia xikinkixti de itech nin tlaltikpak-tli, sino xikinpalevi para amo ma kinkajayava in Amo Quali Tlakatl.

¹⁶ Ijkó kemin Ne amo nipovi de nin tlaltikpak-tli, yejvah noiiki ayakmo povih de nin tlaltikpak-tli.

¹⁷ Xikintlali ma yetokah itech tlen yi neli melajka para ma yekah yolchipavakeh iva ma tekipanokah san para tejwatzi. Motlajtol yen yejón tlen yi neli melajka.

¹⁸ Ijkó kemi tejwatzi otechvaltitanke innavak in tlaltikpaktlakah, ijkó noiiki Ne nikintitlani innavak in tlaltikpaktlakah.

¹⁹ Ne nimotemaktia por yejvah para nikchivas tlen tejwatzi tikneki, para ijkó yejvah noiiki ma motemaktikah ma kichivakah tlen tejwatzi tikneki por yen motlajtol tlen melajkayotl.

²⁰ 'Ne amo nimitztlatlavtia san para yejvah tlen nikinmachtia, sino noiiki para tlen satempa tlanel-tokaskeh nonavak ijkuak kikakiskeh intlajtol de tlen nikinmachtia.

²¹ Ne nimitztlatlavtia ke nochtin yejvah ma setitokah san sekka. Ijkó kemi tejwatzi ivan Ne, tisetitokeh san sekka. Nimitztlatlavtia yejvah noijki ma setitokah tovah. Iva ijkó in tlaltikpaktlakah ma kineltokakah nik tejwatzi otechvaltítlanki.

²² In mavistílistli tlen otechmakak tejwatzi, Ne noijki yonikinmakak para ma setitokah san sekka ijkó kemi tejwatzi ivan Ne tisetitokeh san sekka.

²³ Ne nietos innavak, iva tejwatzi tietos non-avak para ijkó yi neli ma setitokah san sekka. Iva ijkó in tlaltikpaktlakah ma kajsikamatikah nik tejwatzi otechvaltítlanki, iva nik yi neli tikintlasojtla ijkó kemi tejwatzi techtlasojtla.

²⁴ 'NoTajtzi, níkneki ke tlen tejwatzi otechinmakak noijki ma yetokah nova kan Ne nietos, para ma kittakah nomavistílis tlen otechmakak porke nochipa techtlasojtla desde ijkuak ayamo okatka nin tlaltikpaktli.

²⁵ NoTajtzi, tejwatzi titlakamela, in tlaltikpaktlakah amo mitzixmatih, pero Ne nimitzixmati, iva ninmeh tlen otechinmakak yokimatkeh nik tejwatzi otechvaltítlanki.

²⁶ Ne yonikinmatílti akin tejwatzi, iva ok nikinmatíltijos, para ke in tlasojtlalistli tlen ika techtlasojtla ma yeto intech yejvah, iva Ne noijki nietos intech yejvah.

18

Jesús okikitzkijkeh

(Mt. 26:47-56; Mr. 14:43-50; Lc. 22:47-53)

¹ Ijkuak Jesús otlanki okijto nin tlajtoli, okiski invan momachtijkeh iva oyajkeh ik nepa lado de kan barranca de Cedrón. Ompa okatka se tlatokkuavyo, iva Jesús ivan momachtijkeh ompa okalakeh.

² Judas, tlen okitemakti in Jesús, okixmatia yejón lugar, porke Jesús ivan momachtijkeh miek welta ompa omololovayah.

³ Ijkuakó Judas ompa oajsito kinvika miekeh soldadojtih iva sekimeh templojmayoltih. Yejon-meh okintitlankeh in tlayakankeh tiopixkeh ivan fariseos. Ompa oajsitoh ika inkandil iva ika okotl motlavilijtihih, iva okinvikayah intejteposvah.

⁴ Pero komo Jesús yokimatia nochi tlen omochivaskia, okiski okinnamikito iva okinmilvi:

—¿Akin inkitemovah?

⁵ Yejvah okinankilijkeh:

—Tiktemovah Jesús de Nazaret.

Ye okinmilvi:

—Yen Ne.

Judas, tlen okitemakti in Jesús, ompa omoke-toka invan soldadojtih ivan templojmayoltih.

⁶ Iva ijkuak Jesús okinmilvi: “Yen Ne”, yejvah otzinkiskeh iva oajketiajkeh ovetzitoh ipan tlali.

⁷ Ijkuakó Jesús oksemi okintlajtlani:

—¿Akin inkitemovah?

Iva yejvah okilvijkeh:

—Tiktemovah Jesús de Nazaret.

⁸ Jesús oksemi okinmilvi:

—Yonimechilvi nik yen Ne. Tla Ne innechte-movah, tonses xikinkavakah ninmeh ma viah.

⁹ Ijkó okijto para ma mochiva tlen Jesús okijtojka: “Tlen tejwatzi otechinmakak, nion se amo omoixpolo.”

¹⁰ Ijkuakó Pedro okixti iespada iva okinakastzonteki in Malco, okitzontekili iyeknakas. Malco okatka itlakeval in wei tiopixki.

¹¹ Jesús okilvi in Pedro:

—¡Xikalaki moespada kan okatka! Tla noTajtzi kineki ijkó ma nikpano nin tlajyovilstli, tonses moneki ijkó nikpanos.

Jesús okivikakeh inavak Anás

(Mt. 26:57-58; Mr. 14:53-54; Lc. 22:54)

¹² Ijkuakó in kapita ivan isoldadojvah, iva sekimeh templojmayoltih, okikitzkijkeh in Jesús iva okijlpijkeh.

¹³ A ocho okivikakeh ikalijtik Anás. Anás okatka temonta de Caifás. Iva Caifás okatka wei tiopixki itech yejón xivitl.

¹⁴ Yejón Caifás yen tlen okachi ocho okinmilvijka in tlayakankeh judiojtih ke okachi kuali ma ixpolivi san se tlakatl por nochtin toknivah, iva amo nochi topaís ma ixpolivi.

Pedro okijto amo kixmati in Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedro ivan oksé momachti okisegurojkeh in Jesús. Tlen oksé momachti omoixmatia ivan wei tiopixki, por eso ye okalakki ivan Jesús kan ikiavak in wei tiopixki.

¹⁶ Pero Pedro omoka kiavak kaltempa. Por eso, tlen oksé momachti tlen iva omixmatia in wei tiopixki, okiski iva omotlapovi ivan se sivatl tlen

tlakuidarova kan kaltentli, iva okavili ma kalaki in Pedro.

¹⁷ Ijkuakó yejón sivatl okitlajtlani in Pedro:

—¿Te amo noiiki titeva timomachti de neká tlakatl?

Pedro okinankili:

—Amo, ne amo.

¹⁸ Tlen tekipanovah itech yejón kali ivan templojmayoltih, okitlalijkeh tilitl iva omoskojtokah mokejketokeh porke chikavak osevaya. Pedro noiiki ompa invah omoskojtoka.

Anás okitlatzintoki in Jesús

(Mt. 26:59-66; Mr. 14:55-64; Lc. 22:66-71)

¹⁹ In wei tiopixki ope kitlatzintokia in Jesús aserka de tlen momachtijkeh iva de itlamachtih.

²⁰ Jesús okinankili:

—Ne nochipa onitetlapoviaya inmixpa nochtin gentejtih iva amo san ichtaka. Ne nochipa onitlamachti kan tiotlamachtijkaltih iva kan templo kan mololovah nochtin judiojtih. Amitla onikijto san ichtaka.

²¹ ¿Tleka yej Ne techtlatzintokia? Xikintlatzintoki tlen onechkakeh. Yejvah velis mitzilviskeh tlen Ne onikinmilvi.

²² Ijkuak Jesús ijkó okijto, ijkuakó se templojmayol tlen ompa okatka, okixtlatzini in Jesús iva okilvi:

—¿Ijkó timixevia tiknanankilia in wei tiopixki?

²³ Jesús okinankili:

—Tla onikijto itla tlen amo kuali, xikijto tlán amo yompa tlen onikijto. Pero tla onikijto tlen yompa, ¿tleka techixtlatzinia?

24 Satepa Anás okititlanki in Jesús ijilpitiv inavak in wei tiopixki Caifás.

*Pedro oksemi okijto nik amo kixmati in Jesús
(Mt. 26:71-75; Mr. 14:69-72; Lc. 22:58-62)*

25 Pedro ok omoketoka omoskojtoka. Iva ompa okitlajtlanjkeh:

—¿Te amo titeva timomachtí de neká tlakatl?
Pedro amo okimokuiti, iva okijto:

—Amo, ne amo.

26 Ijkuakó se itlakeval in wei tiopixki, tlen itla ivan mottah in tlakatl tlen Pedro okinakastzon-teki, okitlajtlani:

—¿Ke amo te onimitzítak ivan Jesús kan tlatokxochío?

27 Pedro oksé welta amo okimokuiti, iva san nima ijkuakó ovaltzejtzik in kaxtil.

Jesús inavak Pilato

(Mt. 27:1-2,11-14; Mr. 15:1-5; Lc. 23:1-5)

28 Jesús okikixtijkeh de ikalijtik in Caifás iva okivikakeh kan palacio kan ochantia in kobernador Pilato. Iva komo yotlanestivalaya, in judiojtih amo okinekeh okalakeh kan palacio para amo mijtlakoskeh porke okinekiah yeskeh chipavakeh para velis kikuaskeh in tlakuali de Pascua.

29 Por eso Pilato okiski kiavak, iva okintlajtlani:

—¿De tlan ik inkiteilviah nin tlakatl?

30 Yejvah okinankilijkeh:

—Nin tlakatl kichiva tlen amo kuali, por eso nika timitzvalikiliah.

31 Ijkuakó Pilato okinmilvi:

—Xikvikakah iva imejvah xikittakah kox tlajtlakole o noso amo, ijko kemi kijtova inmotlanavatil.

In tlayakankeh judiojtih okilvijkeh:

—Tejvah tijudiojtih amo techkaviliah ikka ma tikmiktikah.

³² Ijko opanolok kemi Jesús okijtojka de kenik ixpolivis.

³³ Pilato oksemi okalakki kan palacio. Okinotzki in Jesús iva okitlajtlani:

—¿Te tiwei tlanavati de judiojtih?

³⁴ Jesús okilvi:

—¿De te motech kisa techtlajtlania o noso ikka omitzilvi nik Ne niwei tlanavati?

³⁵ Pilato okinankili:

—Ne mach nijudio. Mopaisanojvah ivan tlayakankeh tiopixkeh yevvah omitztemaktikoh nonavak. ¿Tlan otikchi?

³⁶ Jesús okinankili:

—Ne amo nitlanavatia itech nin tlaltikpaktli. Tla ijko oyeskia, notlakavah onechpaleviskiah para amo ma nechtemaktikah inmak in judiojtih. Pero Ne amo nitlanavatia itech nin tlaltikpaktli.

³⁷ Ijkuakó Pilato okitlajtlani:

—Toneses, ¿kijtosneki tiwei tlanavati?

Jesús okinankili:

—Te yotikijto ke Ne niwei tlanavati. Para yejón nik onineski iva onivala itech nin tlaltikpaktli para niktematiltis tlen melajkayotl. Nochtin tlen kixmatih iva kijtovah tlen melajkayotl, kimatih nechkakah.

³⁸ Pilato okitlajtlani:

—¿Iva tlan kijtosneki yejón tlen melajkayotl?

Pilato okitemakti in Jesús para ma kixpolokah (Mt. 27:15-31; Mr. 15:6-20; Lc. 23:13-25)

Ijkuak Pilato ijkó okitlajtlani in Jesús, oksé welta okiski omotlapovito invan judiojtih, iva okinmilvi:

—Ne amo nikajxilia itla tlamantli para velis nikijtos ke nin tlakatl tlajtlakole.

³⁹ Pero imejvah inkipiah kostumbre innecht-lajtlaniliah kada xivitl itech ilvitl de Pascua ma nikajkava se de yejvah tlen tzaktokkeh telpiloya. ¿Inkinekih ma nikajkava in wei tlanavati de judiojtih?

⁴⁰ Ijkuakó nochtin otzajtzikeh chikavak, okijto-jkeh:

—¡Amo, ye amo! ¡Xikajkava in Barrabás!

Yejón Barrabás okatka ichtekki.

19

¹ Ijkuakó Pilato otlanavati ma kivikakah in Jesús iva ma kivitekikah.

² In soldadojtih okichijchijkeh se korona de vitztli iva okitlalilijkeh itech itzonteko in Jesús, iva okikentijkeh se tlakemitl chichilkatlimiktik.

³ Omotokijkeh inavak Jesús iva okilviayah:

—¡Viva in wei tlanavati de judiojtih!

Iva okixtlajtlatziniayah.

⁴ Pilato oksemi ovalkiski iva okinmilvi in judiojtih:

—Xikittakah, yonikvalkixti nika kiavak, para xikmatikah ke amo nikajxilia itla tlamantli para velis nikijtos ke nin tlakatl tlajtlakole.

⁵ Jesús ovalkiski ika se korona de vitztli ipan itzonteko iva okikentivalaya in tlakemítl chichílkatlilmíktik. Ijkuakó Pilato okinmilvi:

—¡Nika kajki nin tlakatl!

⁶ Ijkuak okittakeh in tlayakankeh tiopixkeh ivan templojmayoltih, ope tzajtzih chikavak:

—¡Xikrusifikaro, xikrusifikaro!

Pilato okinmilvi:

—Imejvah xikvikakah, iva imejvah xikrusifikarokah, porke ne nikitta amitla okichi.

⁷ Pero in tlayakankeh judiojtih okinankilijkeh:

—Tejvah tikpiah se tlanavatili kan kijtova nik kipia tlen mikis, porke kijtova ke Ye iKone in Dios.

⁸ Ijkuak Pilato okiakakki tlen okilvijkeh, okachi omomavti.

⁹ Pilato oksemi okalakki kan palacio iva okitlajtlani in Jesús:

—¿Te de kan tivitz?

Pero Jesús amo okinankili.

¹⁰ Ijkuakó Pilato okilvi:

—¿Amo technankilis? ¿Ke amo tikmati ke ne velis nitlanavatis ma mitzkrusifikarokah o noso ma mitzkajkavakah?

¹¹ Jesús okinankili:

—Amo otikpiaskia nion itla tlanavatijjayotl itech Ne, tla Dios amo omitzmakaskia tlanavatijjayotl. Por eso, tlen momak onechtemakti, okachi tlajtlakole ke te.

¹² Desde ijkuakó Pilato ope kitemova kenik velis kikajkavas in Jesús, pero in judiojtih okachi otzajtziyah chikavak, okijtovayah:

—¡Tla tikajkavas yejón tlakatl, kijtosneki amo moyolikni in César, porke tlen kineki motenevas kemi wei tlanavati, kijtosneki kikualankaita in César, tlen wei tekiva!

¹³ Ijkuak Pilato ijko okikakki, otlanavati ma kivalkixtikah in Jesús, iva Pilato omotlali kan teyekankavah. Kan omotlali, yejón lugar itoka ika tlajtoli hebreo Gabata, kijtosneki piso de tetl.

¹⁴ Yejón tonali yomotlayektlalilijtokah para mostlatis yi ilvitl de Pascua, iva ijkuakó yokatka kemi tlajko tonali. Iva Pilato okinmilvi in judiojtih:

—¡Nika kajki nimowei tlanavati!

¹⁵ Pero yejvah otzajtzikeh chikavak:

—¡Ma miki! ¡Ma miki! ¡Xikrusifikaro!

Pilato okinmilvi:

—¿Inkinekih ma nikrusifikaro nimowei tlanavati?

Pero in tlayakankeh tiopixkeh otlanankilijkeh:

—¡Tejvah mach tikpiah oksé wei tlanavati, san yen César!

¹⁶ Ijkuakó Pilato okinmaktili in Jesús para ma kikrusifikarokah, iva yejvah okivikakeh.

Jesús okikrusifikarojkeh

(Mt. 27:32-44; Mr. 15:21-32; Lc. 23:26-43)

¹⁷ Jesús okiski kikechpanojtiv ikrus asta kan kilviah Mikatzontekomatl tlen ika tlajtoli hebreo itoka Gólgota. ¹⁸ Ompa okikrusifikarojkeh in Jesús iva noijki ompa okinkrusifikarojkeh ok ome tlakah tlanajnakastla, iva Jesús tlatlajkotia.

¹⁹ Pilato okichi se letrero iva otlanavati ma kitlalikah ikuapak in krus. In letrero okijtovaya:

“JESÚS DE NAZARET, WEI TLANAVATI DE JUDIOJTIH.”

²⁰ Miekeh judiojtih okilerojkeh yejón letrero porke kan okikrusifikaroykeh in Jesús okatka serka de Jerusalén, iva oijkuilitoka ika hebreo, ika griego iva ika latín.

²¹ In tlayakankeh tiopixkeh judiojtih okilvijkeh in Pilato:

—Amo xikijkuilo: “Wei tlanavati de judiojtih”, sino xikijkuilo: “Tlen moteneva wei tlanavati de judiojtih.”

²² Pero Pilato okinnankili:

—Tlen yonikijkuilo ijkó ma mokava.

²³ In soldadojtih satepa de okikrusifikaroykeh in Jesús, okontilankeh itzotzol in Jesús, okitzotzomonijkeh omotlanki navi pedaso iva okimoxejxelilijkeh entre navi soldadojtih. Noijki okontilankeh itlaken tlen okimokentiaya tlen amo kana oijtzontoka iva okatka ajsitok san se tzotzoli. ²⁴ In soldadojtih okimolvijkeh:

—Amo mach tiktzotzomoniskeh, okachi kuali ma timotlanikah, a ver akin kitlanis. Otlamocho ijkó kemi kijtova in Tiotlajkuiloli: “Okimoxejxelilijkeh notlaken iva omotlankeh para kittaskeh akin kimokavis notlaken tlen onikmokentiaya.” Ijkó okichijkeh in soldadojtih.

²⁵ Ik ikxitle ikrus in Jesús ompa okatka imama, noijki ompa okatka se sivatl ikni de imama, ompa okatka María itonana in Cleofas, iva noijki ompa okatka in María tlen de altepetl Magdala.

²⁶ Ijkuak Jesús okittak imama okatka inakastlan momachti tlen Jesús sa tlawel okitlasojtlaya, ijkuakó okilvi imama:

—Sivatl, nonka kajki mokone.

²⁷ Satepa okilvi in momachti:

—Nonka kajki momama.

Desde ijkuakó yejón momachti okiseli kemi imama iva okivikak para ikalijtik.

Jesús oixpolivik

(Mt. 27:45-56; Mr. 15:33-41; Lc. 23:44-49)

²⁸ Satepa de yejón, komo Jesús yokimatia ke nochi itekiv yotlanki, iva para ma mochiva tlen kijtova in Tiotlajkuiloli, okijto:

—¡Namiki!

²⁹ Ompa okatka se xoktzintzi otentoka de vinagre. Yejvah okapachojkeh se esponja ijtik yejón vinagre, iva okitzikojkeh itech imayo in isopojkuavitl iva okonmakakeh itech iten para ma koni.

³⁰ Ijkuak Jesús okiyeko in vinagre okijto:

—¡Nochi notekiv yotlanki onikchi!

Omotzonpilo iva oixpolivik.

Se soldado okitzopiti iomijsikulpa in Jesús

³¹ In judiojtih omotlayektlalilijtokah se tonali antes de ilvitl de Pascua, iva in judiojtih okijtojkeh amo ma mokavakah in mikameh itech inkruks ijkuak sábadó, porke wei ilvitl. Por eso okilvijkeh in Pilato ma tlanavati ma kinmetzpojpostekikah tlen okinkrusifikarojkeh para ma mikikah iva ma kintemovikah de kan krus.

³² In soldadojtih oyajkeh iva okinmetzpojpostekah tlen ome tlakah tlen okinkrusifikarojkeh tlanajnakastla de Jesús.

³³ Iva ijkuak in soldadojtih omotokijkeh kan okatka in Jesús, okittakeh yoixpolivik. Iva por eso ayakmo okimetzpojpostekkeh.

³⁴ Pero se de nonmeh soldadojtih okitzopiti ika se kuavitl yakavitztik kan iomijsikuilpa in Jesús iva niman okiski estli iva atl.

³⁵ Ne nochi kuali onikittak, iva nimechilvia tlen yi neli, para imejvah noijki xikneltokakah.

³⁶ Nochi yejón ijkó opanolok para ma mochiva tlen kijtova in Tiotlajkuiloli: “Nion se iomio amo kipostekiliskeh.”

³⁷ Iva oksé lado itech Tiotlajkuiloli noijki kijtova: “Kitaskeh tlen okitzopitijkeh kan iomijsikuilpa.”

Jesús okitookakeh

(Mt. 27:57-61; Mr. 15:42-47; Lc. 23:50-56)

³⁸ Satepa de yejón, José de altepetl Arimatea, tlen okatka momachti de Jesús san ichtaka porke okinmiimakasia in judiojtih, okitlatlavti in Pilato ma kikavili ma kivika ikuervo in Jesús. Tonses, Pilato okikavili ma kivika. José oyá iva okivikak ikuervo in Jesús. ³⁹ Nicodemo noijki oyá ivan José. Nicodemo yen tlen se welta ovia okittato in Jesús de yovak. Ye okivikak kemi senpoali ivan majtlaktli kilo de ajviakayotl, tlen nelitok de mirra ika áloes.

⁴⁰ José ivan Nicodemo okikemilojkeh ikuervo in Jesús ika tzotzoli tlen patío tlen okinsiajkeh ika yejón ajviakayotl. Okichijkeh ijkó kemi kipiah kostumbre in judiojtih ijkuak kitooka se mikatl.

⁴¹ Kan okikrusifikarojkeh in Jesús ik ompa serka okatka se tlatokxochío, iva kan yejón tlatokxochío ompa okatka se mikatekochtli yankuik kan ayamika ompa okitookayah.

⁴² Ompa okitookakeh in Jesús porke yejón mikatekochtli okatka serka, iva porke yopevaskia in tonali sábado ijkuak in judiojtih omotlayektlaliliayah para moseviskeh.

20

Jesús omoyoliti

(Mt. 28:1-10; Mr. 16:1-8; Lc. 24:1-12)

¹ In primer tonali de yejón samana ijkuak ok tlayovatok, María tlen de altepetl Magdala oyá kan mikatekochtli iva okittak ayakmo tentzaktok ika tetl.

² Ijkuakó María omotlelo oyá kan okatka Simón Pedro ivan oksé momachtli tlen Jesús okitlasojtlaya, iva okinmilvi:

—Okivikakeh ikuerpo in toTeko de kan mikatekochtli, iva amo tikmatih kan okavatoh.

³ Pedro ivan oksé momachtli okiskeh iva oyajkeh kan mikatekochtli.

⁴ Nochtin omeh omotlelojkeh san sekka, pero tlen oksé momachtli omotlelo okachi ke Pedro iva achto oajsito kan mikatekochtli.

⁵ Omotoolo para ontlachias ijtik mikatekochtli, iva okinmitak in tzotzoltih ompa okatkah, pero amo okalakki.

⁶ Satepa oajsito in Simón Pedro, tlen sa ikuitlapa oyaya, iva okalakki kan mikatekochtli. Ye noijki okinmitak in tzotzoltih ompa okatkah.

⁷ Iva noijski okittak in tzotzoli tlen ika okuakemilitoka in Jesús, mach okatka ivan tzotzoltih tlen ika okemilojkeh, sino okatka sekka ololitok.

⁸ Ijkuakó noijski okalakki tlen oksé momachti tlen achto oajsito kan mikatekochtli. Okittak nochi, iva okineltokak.

⁹ In momachtijkeh de Jesús ayamo okajsikamatiah tlen kijtova in Tiotlajkuiloli, nik Jesús omoyolitiskia satepa.

¹⁰ Satepa in Pedro ivan oksé momachti omokuapkeh para inkalijtik.

Jesús okimonextili in María tlen de altepetl Magdala

(Mr. 16:9-11)

¹¹ Pero María tlen de altepetl Magdala omoka chokatok inakastla mikatekochtli. Iva ijkuak omotoolo para oontlachixki ik tlatlajtik,

¹² okinmitak ome ilvikaktlatitlaniltih ika int-laken istak. Oyejyetokah kan okatka ikuerpo in Jesús, se ik ikuatzontla iva oksé ik ikxitla.

¹³ In ilvikaktlatitlaniltih okitlajtlanijkeh in María:

—Sivatl, ¿tleka tichoka?

Ye okinnankili:

—Okivikakeh ikuerpo in noTeko iva amo nikmati kan okikavatoh.

¹⁴ Ijkuak María ijko okinmilvi, omokuapki iva okittak in Jesús ompa mokeatok, pero amo okixmatki kox Ye.

¹⁵ Ijkuakó Jesús okitlajtlani:

—Sivatl, ¿tleka tichoka? ¿Akin tiktemova?

María okiyejyeko xamo yen tlakatl tlen kikuidarova in tlatokxochío, iva okilvi:

—Tla tejwatzi otikvikak in kuerpo, techilvi kan otikavato, iva ne nikuiti.

¹⁶ Iva Jesús okilvi:

—¡María!

Ye omokuapki iva okilvi ika tlajtoli hebreo:

—¡Raboni! —kijosneki Tlamachti.

¹⁷ Jesús okilvi:

—Techkajkava, porke ayamo niav ilvikak in-avak noTajtzi. Pero xivia xikinmilviti noknivah ke niav kan kajki noTajtzi tlen imejvah noijki innoTajtzi, tlen Ne noDios iva tlen imejvah noijki innoDios.

¹⁸ Ijkuakó María tlen de altepetl Magdala oyá okinmilvito in momachtijkeh nik okittak in toTeko, iva okinmilvi nochí tlen Jesús okilvi.

Jesús okinmonextili in momachtijkeh

(Mt. 28:16-20; Mr. 16:14-18; Lc. 24:36-49)

¹⁹ In primer tonali de yejón samana ijkuak otlayovak, in momachtijkeh omololojkeh iva omokaltzajtzakeh porke okinmiimakasiah in tlayakankeh judiojtih. Ijkuakó Jesús ovalmonexti ik tlatlajko de kan yejvah okatkah iva okintlajpalo, okinmilvi:

—¡Xietokah ika kuali!

²⁰ Satepa de ijko okinmilvi, okimititi imavah iva iomijsikuilpa. Yejvah sa tlawel opakeh ijkuak okittakeh in toTeko.

²¹ Jesús oksemi okinmilvi:

—¡Xietokah ika kuali! Ijko kemi noTajtzi onechvaltitalanki, ijko Ne noijki nimechtitalani.

²² Ijkuak ijkó okijto, okinmijpitzki iva okinmilvi:

—Xikselikah in Tioijyotzintli.

²³ Tlen imejvah inkitlapojpolviskeh de itlajtlakol, kiplas tlapojpolvilistli. Iva tlen amo inkitlapojpolviskeh de itlajtlakol, mokavas tlajtlakole.

Jesús okimonextili in Tomás

²⁴ Tomás, se de tlen majtlaktli ivan ome momachtijkeh, tlen okilviayah Nenetl, mach ompa okatka ivan momachtijkeh ijkuak Jesús okimonextili.

²⁵ Satepa, tlen oksekimeh momachtijkeh okilvijkeh in Tomás:

—Yotikittakeh in toTeko.

Pero ye okinmilvi:

—Ne mach nikneltoka. Moneki achto nikinmitas imavah kan okimakojkuyonijkeh ika klavos iva moneki nikalakis nomajpil ompa kan okimakojkuyonijkeh. Iva noijki moneki nikalakis noma kan iomijsikuilpa, para nikneltokas.

²⁶ Ovalchikometik, in momachtijkeh oksemi omololojkeh itech se kali iva Tomás noijki ompa okatka. Nochtin kaltenmeh otzajztaktokah, iva Jesús oksemi ovalmonexti ik tlatlajko, iva okinmilvi:

—¡Xietokah ika kuali!

²⁷ Satepa okilvi in Tomás:

—Xikinmita nomavah iva xikalaki momajpil itech noma. Noijki xikalaki moma ik noomisikuilpa. Xitlaneltoka, amo xieto seppa amo titlaneltokak.

²⁸ Ijkuakó Tomás okilvi:

—¡Tejwatzi tinoTeko iva tinoDios!

29 Jesús okilvi in Tomás:

—Axka tikneltoka porke otechitak. ¡Ma pakikah tlen amo nechittah iva nechneltokah!

De tleka omoijkuilo nin libro

30 Jesús okinchi miekeh oksekimeh tetza-vkaneskayomeh inmixpan momachtijkeh, tlen amo ijkuiltokesh itech nin libro.

31 Pero nochi nin tlen ijkuiltok itech nin libro, omijkuilo para imejvah xikneltokakah ke Jesús yen Cristo, iKone toTajtzin Dios. Iva tla imejvah intlaneltokaskeh inavak, velis inkipiaskeh nemilistli para semijkak por medio de Ye.

21

Jesús okinmonextili chikome momachtijkeh

1 Satepa de yejón, Jesús oksemi okinmonextili in momachtijkeh itempan atl tlen wei de Tiberias. Ijki nik opanolok:

2 In momachtijkeh okatkah san sekka, okatka in Simón Pedro, Tomás tlen okilviayah Nenetl, Natanael tlen de Caná de Galilea, itelpochvah in Zebedeo iva ok ome momachtijkeh.

3 Simón Pedro okinmilvi:

—Niav nikinkitzkiti michimeh.

Yejvah okinankilijkeh:

—Ma tiviah mova.

Tonses oonnevakeh, otlejkokeh itech se barko. Pero yejón yovak mach itla michi okajsikeh.

4 Ijkuak yotlanestivalaya, Jesús okinmonextili itempan atl tlen wei, pero in momachtijkeh amo okimatiah kox yen Jesús.

5 Jesús okinmilvi:

—Telpokameh, ¿onkinmajsikeh michimeh?
Yejvah okinankilijkeh:

—Amo.

⁶ Ijkuakó Jesús okinmilvi:

—Xikontlamotlakah inmored ik iyekmapa in barko iva inkinmajsiskeh michimeh.

Tonses, yejvah ijko okichijkeh, iva satepa ayakmo oveliah okixiayah inred, porke okinkitzkijkeh sa tlawel miekeh michimeh.

⁷ Ijkuakó in momachti tlen Jesús okitlasojtlaya okilvi in Pedro:

—¡Yen toTeko!

Ijkuak ijko okikakki in Simón Pedro nik yen inTeko, san nima okonakijtivetzki itzotzol, porke okatka xipetztki iva omotlamotlak ijtik atl.

⁸ Tlen oksekimeh momachtijkeh oajsitoh atentli itech barko, okitilantiayah in red tentok de michimeh. Okatka sa kana se sien metros de kan atentli.

⁹ Ijkuak otemokeh de itech barko, okittakeh se michi iva se pan ipan tlixochtli.

¹⁰ Jesús okinmilvi:

—Xikinvalikakah sekimeh michimeh tlen yikin onkoninkitzkijkeh.

¹¹ Simón Pedro otlejkok kan barko iva okitilanki in red asta atentli tentok de wejwei michimeh. Okinpoh, okinkitzkijkeh se sienton ivan ompoali ivan majtlaktli ivan eyi michimeh. Maski okinkitzkijkeh miekeh michimeh, in red mach otzomonki.

¹² Ijkuakó Jesús okinmilvi:

—Xivikikah xitlakuakih.

Nion se momachti amo omixevi okitlajtlani akin Ye, porke kualiyokimatiah nik yen Jesús.

¹³ Satepa Jesús omotoki, okontilanki in pan iva okinmajmakak. Noijki okontilanki in michi iva okinmajmakak.

¹⁴ Ika yejón omochi ya eyi welta okinmonextili in momachtijkeh satepa de omoyoliti.

Jesús okitlapovi Simón Pedro

¹⁵ Satepa de otlankeh otlakuajkeh, Jesús okitlajtlani in Simón Pedro:

—Te Simón, tiipiltzi in Jonás, ¿techtlasojtla okachi ke yejvah?

Pedro okinankili:

—Ajá, noTeko, tejwatzi kuali tikmati nik nimitzneki.

Jesús okilvi:

—Xikintlamaka tlen nechseguirovah, porke kateh kemi nochkakonevah.

¹⁶ Jesús oksemi okitlajtlani:

—Te Simón, tiipiltzi in Jonás, ¿techtlasojtla?

Pedro okinankili:

—Ajá, noTeko, tejwatzi kuali tikmati nik nimitzneki.

Jesús okilvi:

—Xikinkuidaro tlen nechseguirovah, porke kateh kemi nochkavah.

¹⁷ Jesús oksemi okitlajtlani ya eyi welta:

—Te Simón, tiipiltzi in Jonás, ¿techneki?

Pedro omoyolkoko porke Jesús ya ipan eyi welta okitlajtlani kox kineki. Iva okinankili:

—NoTeko, tejwatzi kuali tikmati nik ne nimitzneki.

Jesús okilvi:

—Xikintlamaka tlen nechseguirovah, porke kateh kemi nochkavah.

18 Yi neli nimitzilvia, ijkuak otikatka titelpochtli, te monevia otikonakiaya motzotzol iva otiaya san kan te otiknekia. Pero ijkuak tivevejtis, tikintlatztilanas momavah iva oksé mitzonakiltis motzotzol, iva mitzvikas kan amo tiknekis tias.

19 Jesús ijko okilvi, kijtosneki kenik ixpolivis in Pedro satepa, iva kenik kimavistilis in Dios ika imikilis. Iva satepa de ijko okitlapovi, Jesús okilvi:

—Xiviki nova.

In momachtli tlen Jesús okitlasojtlaya

20 Ijkuak Pedro omokuapki, okittak tlen oksé momachtli tlen Jesús okitlasojtlaya, oyaya inkuilapa, tlen achto omonakasiktekek itech Jesús ijkuak okikuajkeh in tlakuali de Pascua, iva okitlajtlanjika: “¿Akin mitztemaktis tejwatzi?”

21 Ijkuak Pedro okittak yejón momachtli, okitlajtlani in Jesús:

—NoTeko, ¿iva ye tlán mochivas?

22 Jesús okinankili:

—Tla Ne niknekis ma yolito asta ijkuak nivalmokuapas oksemi, te mach motekiv. Te xiviki nova.

23 Ijkuakó yejón tlajtoli niman oxitinki itech nochtin toknivah tlaneltokakeh, ke neká momachtli amo ixpolivis. Pero Jesús mach okijto ke amo ixpolivis, sino Ye okijto: “Tla Ne niknekis ma yolito asta ijkuak nivalmokuapas oksemi, te mach motekiv.”

24 Neká tlen oksé momachtli kijtosneki yen ne. Ne onikittak tlen opanolok iva onikijkuilo itech

nin libro. Iva imejvah inkimatih ke nochi tlen nikijtova, yi neli.

²⁵ Jesús okichi okseki miek tlamantli. Iva tla okijkuiloskiah itech librojtih nochi tlen Jesús okichi, yejonmeh librojtih amo oakiskiah itech nochi nin tlaltikpaktli. Ijkó ma yeto.

cv

Itlajtol Totajtzin Dios
Nahuatl, Sierra Negra: Itlajtol Totajtzin Dios New
Testament
El Nuevo Testamento en el náhuatl de la Sierra
Negra de Puebla

copyright © 2017 Wycliffe Bible Translators, Inc.

Language: Nahuatl

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 17 May 2025 from source
files dated 17 May 2025
aeb73bc0-40ce-55ad-9eac-6f44f76aa373